

JUNE 2025

VOLUME 65 • NO. 06



Khristian Thukizakna



EBC media

Kipanpihtuahna Lampi a pai Gingtute

NAS 2:44-47; 9:36-43; GAL 6:2;
LUKE 19:1-10; EPH 2:10; 2 THESS 3:13



08 PENTECOST DAY

15 PATE' NIPINI

22 NAUPANGTE' NIPINI

EDITORIAL BOARD	CONTENTS
Editor Rev. K. Kamchinkhup	1. EDITORIAL : 1
Managing Editor Rev. M. Zalian Guite	2. KIPANPIH TUAHNA LAMPI A PAI GINGTUTE : 3
Contributing Editors Rev. Thawndoulia Rev. Nenglian Vualnam	3. PENTECOST DAY THUPUAK : 7
Production Managers Rev. Chinkhengoupau Buansing Upa T. Paukhansiam Mr. Mangthianlal Samte	4. PATE LEH INSUNG : 11
Circulation Manager Upa K. Jamchinthang C/No. +91 8837208598	5. NAUPANGTE' HOIH DING DEIHNA IN AW : 15
Design & Setting Upa Khuplajem Guite Mr. Chinsuanlal	6. BIBLE STUDY : 20
	7. GAMMIAL AW : 24
	8. EBC INSUNG THU : 29
	9. DORCAS CORNER : 31
	10. YOUTH CORNER : 33
	11. CHILDREN'S CORNER : 33
	12. ORDAIN SUNNA : 35
	13. KIPATHU GENNA LEH THUMNA DINGTE : 39

LAKMAN:
Kum khat ₹ 150.00
Dak ah ₹ 200.00
Bu khat ₹ 15.00

Thusuah ding piakna:
Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan a hikim kholkei.
Thusuahte'n amau thusuah ah moh a
pawtek ding uh.*

A hun ngaihtuah in zaw heutu hikhinta hial le uchin kilawm hiven, Pathian thubulte hilh kiphamoh nawn neive ua, an gum hilou nawitui kiphamoh n'ong hita uhi...Huchi in Khrist thubulte gen nawnlou in pichin lam i manoh ding uh; thilhih sisate kisikna, Pathian lam a ginna, baptisma leh khutngak leh misi thohnawwna leh tangtawn vaihawmna lam thuhilhnate suangphum phum nawnlou in. Pathian in pha a sakleh huai bang i hih ngei ding uhi. Hebrute 5:12; 6:1-3

Igam ah Jesu Khrist Tanchinhoih a hong lutna kum 115 chingta hi. Khrist Tanchinhoih thilhihtheihna in i gam nakpi in hon khek a, mimal, inkuan, saptuam leh khotang hiai tan a dopsang a i omna, hiai Tanchinhoih ziaak ahi, chih thudik nial vuallouh ahi ding hi. Tanchinhoih i gam a hong lut apan en leng, i Pathian thu-awi dan, Pathian thu leh Khristianna i paipih dan hi a i theih mawltak in en leng a phatuam om ding in ka gingta hi.

Pathian thu hong lut chil in, Pathian in i lak ah mawltak lah hattak in amah lam a honna hip hi. “Na min i gelhtutta diam?” chi a sabiak khek a Khristiante lak a tel ding a kichialpi hun a om hi. Hiai hun sung mah ‘zu bel khettap’ ‘dawi umte halsiang’ chihte kigen hun hi a, sahkua khek a chindan kikhek hun a om hi. Hiai dan a kichialpina apan in, “Na piangthakta hia?” chi in Pathian thu thuksem a kichialpina i gam in phattuampih mahmah hi. Hiai hun, chialpi masa dan toh kibanglou ahihna ah ‘Khristian’ hisa lak mah nawk in, a theisiamlou om mahleh, Pathian thu thilhihtheihna toh masawwna thupitak a om hi. Kichialpina masa pen ‘sahkua khekna chialpi’ i chihleh, pianthakna thu a kichialpina pen ‘tangtawn mun ding kikhekna chialpi’ a chihtheih mai diam chih in a om hi.

Pianthakna thu a kichialpina pen aloutheilou ahi a, tuni tan in leng phatuamtak in i paipih thei a Pathian thu toh kituak a

khalam kalsuanna leh vualzawlina thupitak i tantuan uh ahi. Himahleh, hiai mual ah i khawl nilouh a, aban i zop theihlouh nilouh pen etkai tuak mahmah hi. Pathian thu-awina ah pianthakna a sannapen hiam a tawp hilou in gingu hinkhua adia kipatna ahi zaw hi. Hiai ban i gen tham a, himahleh, kichian zoulou hiam i paipih dan in, maban hon sawnpih zoulou ahikha ding hi.

Aban i chih chiang in, ginna a Jesu Khrist Lal leh Hondampa a sang a pianthakna neite adia aloutheilou, Khrist nungzuihna gen i hi. Khristian Thukizakna a *editorial* ka gelh apan hiai lam ngim in ka gelh denlai hi. I niteng hinkhua zat a i lohsapna leh zahlakna apan in Khrist Nungzuihna i poimoh chih a chiang hi. Pathian Laisiangthou thu apan in leng Khrist Nungzui bawl ding Toupa'n thu hon pia a, huai nna sem dia hon sawl ahih dan i mu hi. Huaiziak in, Khrist Nungzuihna lam ah beihpi i suah a pangkhawm a malak leh kalsuan poimoh mahmah hi.

Saptuam in hiai tupna toh thu nasem, Pastor leh Evangelist-te ah pan in Khrist Nungzuihna leh Khrist Nungzui Bawlina ngim in giakkhawm a, sutkhawm ding leh kikupkhawm a kalsuanna masa neih kisawm hi. Huai bang in Division teng ah, Divisional Superintendent teng makaih in semtute, upate leh division makaite lak ah paipih in. Tualsung saptuam chiat ah Pastor leh Upate makaih in makai leh saptuam mite lak ah Khrist Nungzui bawlina kalsuan ding in kisa leng chih i sawm dan ahi.

Saptuam in pianthakna thu a chialpi ding mi hiamtak leh thupitak a Toupa'n a zat i nei a, kipahhuai mahmah. Hiaite ban ah, Laisiangthou a i muh bang in Khrist Nungzui bawl mi ahon piak a, maban i sawn theihna ding in leng thum in i ngen ding uh.

Huaiziak in, kuan unla, namchih apan nungzuite bawl unla, Pa, Tapa, leh Kha Siangthou min in baptist unla, Thu k'on piak tengteng zui ding in thuhilh un. Ngai un, kei tangtawn in, khovel tawppha in leng, na kiang uah ka om ding hi" a chi hi (Mathai 28:19 & 20). ■

KIPANPIH TUAHNA LAMPI A PAI GINGTUTE

- Rev. Paukhanmang Guite

“Thil hoih hih ding a Khrist Jesu a siam a om in, amah khutsuak i hi uhi” (Eph.2:10a)

Thupatna: Tu kha thupi *“Kipanpih tuahna lampi a pai gingtute”* chih in a taklat tup thutawn khat a gen in, *“Gingtu hinkhua tuh panpihtu hinkhua ahi”* chih ahi ding hi. Paul in poimoh ngaih mahmah a Ephesa saptuamte kiang a sinsakna apiak pansan in kikum lehang chi i hi.

Leitung sahkhua tuamtuahte kisinsakna leh mihingte’n thupi asak leh ngaihsang mahmah, *Thil Hoih Hih leh Panpihna Nasep* ahi. Hiaibang nasemtute pahtakman sangpen ‘Nobel Prize’ tanpha piak in om zel uhi. Mother Teresa leng panpihna thil hoih hih ziaak a pahtakman sangtu khat ahi. Gamchih leh munchih ah pawl tuamtuahte’n panpihna nasep semden uhi. Michih a bukim ki-om lou a, i hinsung a banglam hiam bek a panpihna poimoh lou ki-om lou ahi chih thudik ahi. Huaiziak in, Sawltak Paul in gingtute hinpah dia poimoh *thil hoih hih a kipanpih tuahna nasep* ahi chiin tangkoupah hi.

Kipanpih tuahna *thil hoih hih thumal genchetna*, *A manphatnate*, *Panlak dingdan*

leh *Ettontak saptuam masate* toh kisai sau loulou a suikhawm in, michih in kipanpih tuahna lampi ah i kalsuan zelna hiam chih eimah kivelna a nei in, hamphatpih chiat lehang chih i lunggulh leh thumna ahi:

1. Kipanpih tuahna “Thil hoih hih” thumal genchetna: Ephesate 2:10 a Thil hoih hih kichi - Greek ah *erga kala*, English ah *Good works*, ei pau ah *Thil hoih hih*, ahi. Nasep hoihte, thil hoihte, Pathian kipaksak thil hoih hih leh nasepte genna ahi. Paul in a genchet tuptak, vangam i tunchiang a poimoh nawnlou ding,leitung a i khosak sung a poimoh gige, *khat-le-khat kipanpihtuahna dia salam a muhttheih, khoihttheih,*

*sukkhaktheih thil hoihte
sepkhiakna ahi.*

2. Kipanpih tuahna thil hoih hih a manphatnate: Gingtute hiai ding a Khrist Jesu a siam a om (created) i hihman in, Pathian toh i kizopna chidam leh hoih apan gahkhia a, muhtheih a kilang ding, **thil hoih hih** ahi, chih ahi. Hiai bang a muhtheih a gahsuah i hihkeileh bel siam a i omna san semkhe lou leh muanhuai lou hiding i hi chi nuamdan ahi. Kipanpih tuahna thil hoih hih a manphatdan tamlou i taklang zek ding:

2.1 Ginna hinkhiakpihna ahi: Thil hoih hih a nasep hoih sepkhiak i Khristian ginna toh kizui, *ginna muhtheih a lahkhiakna* ahi, chiin Paul in gen hi (2 Kor.9:13). Khristian/Gingtu ka hi kichi a, mihinpihte taksap hun a, panpihna thil hoih hih nei ngei hetloute, ginna nei a kichih uh zuau hiding ahi, chihna bang ahi. Jakob in, mi'n ginna ka nei chi mahleh, thilhih a muhtheih a asepkhiak keileh a zuaupi gengen hiding ahi, a chi hi (Jakob 2:17).

2.2 Gingtute siam a i omna bang a hinkhiakna ahi:

Khrist Jesu a khalam a hotdam a i omna kia hilou a, salam hinkhua a thil hoih hih dia siam a om i hi a, thil hoih hih i khosakna dan hiding in Pathian in a bawlkhol/sepkhol hi (Eph.2:10). Midangte panpihtu hinkhua hinpih ngeiloute tuh Pathian in hon sehkhohlna bang a hing lou chihna ahi a, *thil hoih hih hinkhua neite* bel Pathian seh bang leh lamet bang hinkhua a hingte ahi uhi.

2.3 Midangte adia vualzawlina ahi: Sawltak Paul in Jerusalem a gingu kial thuakte panpihna dia Korinth gingtute thilpiak toh kisai gen in hiai thu genzom hi (2 Kor.9:12a). Hiai thil hoih hih, mihinpihte awlmohna latsakna, *midangte adia vualzawlina* leh mihinpihte taksap *awnghuksakna* nasep ahi, chiin gen hi.

2.4 Pathian tung a kipahtugenna ahi: Hiai thil hoih hih in misiangthoute taksap

a huksak kia hilou in, Pathian hoihna leh zahngaihna dongtute apan kipahna luanglet a *Pathian tung a kipathugenna tampi* tun ahihdan Paul in gen hi (2 Kor.9:12b).

2.5 Pathian kipaksak thilhih ahi: Sawltak Paul in Pathian nna a sepna a kihelkhak sam lunggulhna ziak a Philippite'n huhna thilpiak a piak uh, *Pathian kipaksak thil hoih hih* ahi, chi hi (Philp.4:18c). Gingtu chih in Pathian kipahsak ding i lunggulh ahihman in, tuading a abaihlam pen khat, kipanpih tuahna nasep ahi. Hiaibang hamphatna athawn a liamsak lou di'n na kipan thei gige hi.

2.6 Pathian hih thupi in om hi: Haksa thuak leh tasam mihinpihte tung a gingtu in a *thil hoih hihte* ziak a vualzawlina dongtute'n Pathian a kipan deihsakna leh hamphatna tang ahihdan uh phawk in, Pathian pahtawi in, *Pathian hih thupi a om* ahi, chiin Paul in gen hi (2 Kor.9:13b).

3. Kipanpih tuahna thil hoih hih a panlak dingdan: Paul in Thessalonika saptuamte a hanthawwna thugen, '*Unaute aw, nou zaw thil hoih hih chimtak kei un*' chih ahi (2 Thess.3:13). I mihinpih, a tasam leh haksawzte tung a thil hoih hih, a hong mun luat sim a, chimtakhuai hong bat sim Chiang tanpha inleng, phattuumngaih suah a chimtak lou teitei a kuhkaltak a semkhe dia lamet i hi.

Hiai a chimtak kichi thumal Greek ah *enkakeo* ahi, English ah *weary* ahi. Hiai thumal gen tuh thil hoih hih ding a '*kithalawpna bei*', '*lungkia a tawpsan tum*', '*tawlgawp/bahgawp*' chihthe ahi. Panpihna nasep i chih thil hoih hih a hon thukkik thei ding mi hoihte, mi haute leh mi siamte tung a hih hilou in, chikmah Chiang a thil hoih hih a hon thukkik thei ngeilou ding mi gentheite, mi thulimloute, tasamte leh mi hoihloute tung a sep ahihziak tak in, lungkiakna, bahgawpna leh kithalawpna taksap hun tam mahmah hi. Hiaibang hunte ah zong, thanopsuah leh kuhkaltak a pang teitei a, panla thak zel ding a hasot leh lamet i hi a, huai ding a Khrist Jesu a siam/sekhholhte i hi hilhial hi.

4. Kipanpih tuahna thil hoih hih a ettontak Saptuam masate:

Nasepte 2:44-45 ah gingtu masate'n a thilneihte uh kikop in, nekhawm leh dawnkhawm in a om uh chih i mu hi. Hiai a '*kikop*' kichi Greek ah *koinos*, English ah *common/shared* leh eipau ah '*kihawmtuah/gawmkhawm*' chihna ahi. Nidanglai a lawmta naupangte'n sun ann a nekkhawm ding Chiang un, amau bukhking leh mekhking tawikhawm siausiau in, sa meh neite'n hon tawi in, anteh meh neite'n hon tawi in, malta meh neite'n hon tawi in, a tawikhawmte uh gawmkhawm a a nekkhawm (sharing) bang uh ahi. Gingtu masate leng a hau deuh, a zawng deuh, a genthei deuh om ding uhi. Nekkshawm dawnkhawm dingte amau neih bangbang, phutluhi hilou in a kiphal bangbang chiat uh thohkhawm a kikop uh ahi, chihna dan ahi hi. Tulai a saptuamte'n Khristmas ankuang adia phal bangbang thohkhawm a i nekkhawm bang ahi.

Nasepte 2:45 a, a goute uh leh thil neihte uh a zuak ua,... a hawm zel uhi chih i mu hi. Hiai a '*zuak*' leh '*hawm*' toh kisai a a

lungput leh hihdan uh hichibang ahi. Pathian be khawm leh kithuahkhawm a a-om hunte ua nektawm zong leh tasamte'n leng midangte bang a va kihel a, meikuang paisuak lou a, ann huan ding a taksap louhna ding ua, *anei zaw leh kiching zawte'n a haksa zawte awlmohna lungput nei a kipanpih tuahna nasepna* ahi hi. Kuaman nna himhim sem lou a, asun azan a kipum thuahkhawm mawk a, a neihte uh ne khawmkhawm mawk uh hilou hi. Hiai ah gingtute thilphalna lungput leh mihinpihte awlmohna leh nekngaihna lungput a neih uh, Paul in *Khrist Jesu a thil hoih hih a khosa dia bawlkholh/sehkhohh* (Eph.2:10) a chih bang hinkhua aneih uh ettontak leh thupi petmah ahi hi.

Thukhitna: Saptuam sung mite lak a anei zaw deuhte leh ahaksa zaw deuhte, ahatzaw deuhte leh ahatlou zaw deuhte, apil deuhte leh pillou deuhte kal bangtan in a kinai diam aw? Gingtu chih "*Kipanpih tuahna lampi a i paikhawm*" dan ah kichimatna leh kigamlatna kinga ding hi.

Kipanpih tuahna lampi a paithei dia Pathian in neih-

le-lam, pilna, chidamna leh hihtheihna a avualzawl gingtute'n i hamphatna tungtuan ahi chih phawk in, amau kia aleng kisikhop mahmah, atasam leh gentheite panpihtu ding a Pathian hon sehkhoh i hihdan phawk in, Pathian kipaksak nasep ah

naksem in pan i la kei dia hia? (cf. 1 Tm.6:17-19).

Kipanpih tuahna thil hoih hih a tonkhawm gingtute hiding a Pathian in Khrist Jesu a hon bawlkholhna hinkhua hinpih chiat ding in tuni in panla thak ni chiin Toupa min in i kichial hi. ■

PENTECOST DAY THUPUAK

- Rev. Khamkhanchin Ngaihte

Thumasa: Pentecost kichi Thukhun Lui hunlai apan ana kizang, Thukhun Thak hun a Khasiangthou zang a Pathian' nasep thupi genna a kizang thumal ahi. Thukhun Thak a, sihna in lentang zoulou a i Toupa Jesu han apan kaihthoh ahih a, van a laktouh ahih apan sim a ni sawmnga (50) a phakni ahi. Hiai ni a hong poimohna mahmah tuh Khasiangthou hong tunni ahihtoh akiton ziaak ahi. Tuni a i gennop leng a day/ani hizaw lou in hiai ni a Kha zang a Pathian' nasep ahizaw.

Thukhun Lui hunlai in Pentecost i chih Juda sabiak a kibulphuh ankuanglui ni/ noppawlina ni khat ahi. Paikan Ankuang Lui zohnung nikhat apan simtough ani 50 ni ahi a, pawltak ankuanglui ni chih in leng a om (Numbers 28:26ff, Lev 23:15ff). Juda sabiak adia noppawlina poimoh mahmah khat ahi. Hiai ni in Judate a gah masate uh tawi in Pathian in buh leh bal a a vualzawlina ziaak a kipahna ankuang luina

bawl ding in Jerusalem ah paikhawm zel uhi. Pathian vualzawlina ziaak a kipahthu genna a ankuanglui ni ahi. Huai omdan bel, Khasiangthou piak a om ni Pentecost Ni kichi hilou in Pentecost Ni a Khasiangthou hongtung chih ding ahizaw.

Khasiangthou i chih Pathian a mithumte lak a khat ahi (Pa Pathian, Tapa Pathian, leh Khasiangthou Pathian). "Kha" (*Spirit*) pen "siangthou"

(*holy*) in ahihna ahihlhchian a, kha khat peuh genna ahi kei. Thukhun Lui hun a Bible thumal “siangthou” i chih Hebru pau ahi a, *qados* kichi, Pathian’ adia sehtuam siangthou genna ahi tangpi. Huan, *khai* chih Hebru ah *ruach* ahi a, Greek ah *pneuma* ahi. Laisiangthou a akizatna tangpi ah muhtheihlouh ahihna lam hizaw lou in, thahatna (*energy*) hiam thilhihtheihna (*power*) genna lam a hizaw sek hi.

Thukhun Thak ah hiai Pentecost Day saptuam ading a hun poimoh mahmah ahong suak hi. Jawlneite hun lai a Pathian in miteng tung a akha asunbuak ding ana gen (Joel 2:28-32) tangtunna ahi. Saptuam kipatna a chiamteh ahi a, Pathian’ thuchiam tangtunna khat ahi hi. Thukhun Thak a Khasiangthou tunna toh kisai kigenna bulpipen tuh Nasepte 2 ahi. Huaiziak in, Nasepte Laibu leng sawltakte zang a Kha nasep genna bu ahi.

Tutung in Khasiangthou toh kisai hilou in ana sep toh kisai saulou kikum le chih i sawmdan ahi. Laisiangthou a Khasiangthou nasep kigente toh tulai a Kha nasep i chihte

akibang mah hiam chih tuh tulai gingtute adia suut tham a poimoh ahi. Gingtute thu-up (*doctrine*) poimoh mahmah lah akitheikhialpen khat ahi de aw chih in a om hi.

Khasiangthou tunna in agahsuah khenkhat sut khawm ni:

1. Khasiangthou i chih mihingte hihtheihna khen a nasem, Pathian’ vanzat, mihingte thunun theih hilou ahi. Nasepte 2 a Khasiangthou a hong tundan i etleh mihingte thilhihtheihna khenlam a thiltung ahi (Nasepte 2:1-3). Mihingte kipiaksawn theih hiam luahsawn theih ahi kei a, Pathian’ deihna bang a amah a nasem ahizaw. Kha in hihtheihna apiak a a pausak bang in paudangte in a pauta uhi (v 4) achi. Kha in a luah mite Kha makaihna bang in a gamtang ua, a paukam uleh omdan tan uah Kha in thunun ahi. Hiai a theihding a poimoh, “Kha in a pausak bang zel in...” chih ah pau theihngeilouh/ gen neilou paukam hilou ahi. Aziak, “michih in apau uh amau pau chiat a azak ziaak un....” (v 6) a chi. Khasiangthou tunna mite’ thugente a paikhawm a za mi

tuamtuamte'n amau pau chiat a za uh ahi chih ahi. Tulai khovel ah, Khasiangthou bang mimal vanzat hiam neih hiam bangle a ngaihna a om dekkek a, lauhuai mahmah ahi. I theihlel mahmah ding a hoih ahiehleh, Khasiangthou i chih mihing thunun theih ahikei a, himahleh, Khasiangthou in kuamah thunun zohlouh a neikei hi.

2. Khasiangthou nasep poimoh mahmah khat ahiehleh Tanchinhoih genna toh kisai in agen mite hangsanna toh thuam hi. Tanchinhoih/Pathian thu genna a mihing mitmei veenluatna a-omleh Kha thopna i chi hiam makaihna tellou ahiehna kilatna ahimai hi. Nasepte 2:14 apan i sim sukleh Khasiangthou thilhihtheihna Peter tungtawn a taklat a om i mu. Peter i chih azuih Jesu Khrist thumvei hilhial ana zuausan pa ahi. Himahleh, Khasiangthou a luahtdim ahieh toh kiton in Juda mite mai ah Kha nasep gum in hong paukhia hi. A chipih Juda mipite ma ah, a gitlouhna ziaak ua khelhna neilou Khrist kilhlumtute ahiehdan uh gen in, tua Khrist, Pathian in kaithou nawn ahiehdan a tangkoupah hi.

Kikhekna thupi hina maizen e! Jesu Khrist tanchinhoih genziak a mat, soisak, leh gennawnlou dia vau ahiehlah un leng, Peter leh nungzui dangte'n, "mihing thu sang a Pathian thu i manzawk ding ahi" achi ngam uhi (Nasepte 5:29). Paul in, "Tanchinhoih ka zumpih kei" ana chi a, aziak ahiehleh hotdamna ding a Pathian' thilhihtheihna ahiehziak in (Rome 1:16). Khasiangthou thopna tang a, Tanchinhoih gum a sihpah a pang Pathian' sikha hangsanna ahi. Tulai i gam ah hiaibang Khasiangthou thopna tang a theihpihtu ding, Tanchinhoih gum ngam gingtu poimoh hina mai hang e!

3. Thukhunthak a saptuam i chih Pentecost Ni a hong kipan ahi. Kha thopna tang a Peter thugenna tungtawn in mi 3000 velin hotdamnatang in saptuam hong piang hi (Nasepte 2:41). Saptuam i chih gingtute genna ahi a, gingtute kilawikhawmna leng ahi. Mimal mal a saptuamte'n saptuam pawlpi a hon bawl hi. Gingtute i chih Chiang in Khasiangthou nasep gah i hi uhi. Khasiangthou nasepna tungtawn in saptuam ahong piang a, huai saptuam

a makai/heutu ding leng Khasiangthou mah in gingtute tungtawn a atel a, mohpuakna a piak ahi (Nasepte 20:28). Tua saptuam kipawlkhawmna (Khrist' pumpi) lamtouhna ding a thilpiak tuamtuam leng Khasiangthou in apiak, ahawmzak ahi (Rome 12:3-8; 1 Korinthte 12:4-28, 14:12). Huaiziaik in, Khasiangthou tellouhna saptuam tuh saptuam si ahi. Thukhun Thak a Pentecost ni a Khasiangthou nasep in Thukhun Lui hun a mahni kitawisang utna a Babel insang kilam (Gen 11:1-9) in a gahsuh kikhenna leh buaina tuam dam in, Khrist a pumkhat suahna atun hi. Khasiangthou nasep mah in Judate ban ah Zentelte uapkha in Tanchinhoih nasepna adalh hi.

4. Pentecost Ni a Khasiangthou piak a om in khamangthang matna i chi hiam Tanchinhoih genna saptuam nasep thupipen ding ahihdan ahon phawksak hi. Jesu Khrist thupiak zui in gingtute (mi 120 vel hiding) Jerusalem ah kikhawm uhi. Huai hun in Khasiangthou nasepna thupitak muh in om hi. Tua Khasiangthou

thopna tang a Tanchinhoih genna nasep gah in gingu 3000 vel a behlap ahi ua, huchiin, Tanchinhoih genna hong kipehsawn in, Judea leh Samaria gamlam tan ah Tangthupha gen in om hi. Leitung a nam tengteng uapkha Tanchinhoih gen ding saptuam mohpuak ahi (Matt 28:19-20). “Ngai un, kei, tangtawn in, khovel tawppha in leng, na kiang uah ka om gige ding” (Matt 28:20) chih thuchiam muanhuai toh kizui thupiak gol ahi.

Thukhitna: Leitung pilna, siamna leh neih-le-lam itluatna hinkhua ah Khasiangthou in mun nei lou deuhdeuh abang hi. Gingu mimal hinkhua leh saptuam pawlpi hinkhua ah leng Khasiangthou ngei ngaihlouhna khang semsem hi. Ahitak in, Pathian' *mission* i chih Khasiangthou thopna tellou a septheihlouh nna ahi. I niteng gingu khualzinna (nungzuihna) ah leng Khasiangthou mah i poimohpen ahi gige. Hiai Noa long leppihpa laukha i poimohdan phawk in, amah toh i hinkhua lemkhawm in i gam kisesa tungding thak ni. ■

PATE LEH INSUNG

- Rev. Dr. S. Vung Minthang

Billy Graham in “Pate’n a mohpuakna uh ngainep a, i inkuante uh akitapkhap zellai in, i gam uh kingakna lungsim hoihna suangphum (*moral foundation*) a chipsiat ding lauhhuai dinmun ah i om uh” chiin kum tamtak paita in ana gen hi. Amahmah in “Inkuan akisiat chiang in *society* kipumkhatna leng ahong kisia hi” ana chi hi.

Inkuan, Saptuam leh Khotang, i chihthe akizom dindian ahi uhi. Hiaiteng lak ah a suangphum poimoh masapen ‘*inkuan*’ ahi. Inkuan tuh thil bawlkhiakna *factory* toh kibang ahi. Inkuan in abawlkhiak khangthakte (a product-te) hong piching ua saptuam, khotang, leh gam-le-nam makai ahong hih chiang un aneulai ua pan akhankhiakpih uh inkuan kikepna *quality* ahoih ahong dawkkhia hi. Huchi ahihlai in, eite’n khovel kisia, gamsung kisia, *politics* kisia, i chi zenpeuh uhi. Adiktak in khotang kisia, gamsung kisia i chihthe, a *system* kisia i chihthe a mihing kisia ana hilim ahi. Hiai siatnate lak a dingtang zou ding in damdawi (*antibiotic*) hoihipen Khristian inkuan diktak sung ah Pathian in ana koih khin hi. Ngaihdan bawltawm zual ah tuh ‘insung ah tate kuamah in guktak ding, zu dawn ding, sum

negu ding a kihillhou khotang siat ziaak ahi’ chih ahi. Awle! Khelhna bel koipeuh ah a-om chih Bible in agensa mah ahi. ‘Kare!! Khotang a khelhna ana om ziaak a ang vakawmkha, va negukha kei vele chih paulam aom louhna ding a “Pathian limsak chi (suan)” (Mal. 2:15) bawlkhiakna dia Pathian in inkuan ana bawl ahi. Khelhna bel pianken a omsa ahi a, huai zou ding a Jesu Khrist hotdamna kisam i hi uhi. David in “Ka nu’n khelhna in hon na paai” achi hi (Pau. 22:15; Sam 51:5; Rom. 5:12, 19; Eph. 2:3; Job 14:4; 15:14). Khrist nei taktakte’n huaite zohtheihna nei uh ahi.

Laisangthou in, “A paina ding lampi ah naupang chil in, huan a-upat hun na ngawn in leng huai a kipan apial kei ding hi,” chi hi (Pau. 22:6). Naupangte aneulai teng uh sinsak hun ahi

a, ahonglet ua ahong pichin hun uh bel i sinsakna gahkhiak hun ahi. Tulai i Khristian hinkhua uh et in hiai *sinsakna hun* hia i mohsak ding *agahkhiak hun?* chih kikal theibuai tampi om hi in amuhtheih hi. Thil bawlkhiakna *company* hoih leh minthang etsakna ding in *Apple Company* in abawl *iPhone*, *computer*-te, koi gam peuh ah, mi akua-akua in zangta leh ahoih veve ua, michih in neih uthuai asa chiat uhi. Tuabang in inkuan leng Pathian lau, khelhna hua chi siangthou bawlkhiakna ding a Pathian in ana pat ahi. Billy Graham gen bang in insung *quality* khotang a kilang hi zaw ahi. Insung lemlak (*photo*) i khotang uh ahi.

Pathian' thilgel ah inkuan ana poimoh petmah chih i phawkthak uh apoimoh hi. Leitung luahtim ding kia Pathian' thiltup ana hileh uile-akte bang a inkuan tuam chih leng omlou in a manman toh sak-le-khang a ta nei zelzul dia leng hon bawl thei ahi. Pathian' bawl inkuan achituam vilvel khat ahi. Inkuan thupidan gam leh nam kivaihawmna masa ahihdan hiai dan in en zual leng:

- **Pate Insung a Lupen:** Gam khat ah heutupen Emperor/President/Prime Minister chihthe mun ading in insung ah Pa akoih hi. Nute pen Pasalte huhtu in (Gen. 2:18).

- **Inkuan Pai Dingdan:** Gam chih in *constitution* anei chiat ua, tua dan nuai ah kivaihawmna aom thei hi. Inkuan ah Pathian in tua dan ana koih khin hi; Pa hih ding, Nu hih ding, Tate hih ding, midang toh kal, thil neih toh kisai, mihingte kizopna toh kisai bangkim a om hi.

- **Dan zui a Thukhenna:** Gam khat a Judiciary system alou theilou ahiahbang in insung in thukhenna dan azuih teitei ding om hi. Insung a phal leh phallouh (*legal/illegal*), thildik leh diklou (*moral/ethics/principles*), tua dante pansan in nu leh pate'n a insung uah *discipline* leh thukhenna apoimoh dan Bible in a uang gen mahmah hi, e.g. Diut. 6:4f; Pau. 13:24; 23:13 sim in.

- **Nasepna tuamtuam:** Government khat in Education, Defence, Agriculture, Trade & Commerce, Finance, External Affairs, Social Welfare, etc. aneih bang in inkuan khat

sung ah hiaite akim in aom hi. Inkuan pen gam khat toh teh dia neuchik ahihman in tua kivaihawmna *department* tuamtumte Chiangtak a kilangkhe theilou pawl om mahleh civil governing essence bel inkuan (*family*) ah aom hi. Hiai principle-te zang a ki-enkol Khristian Inkuan apan khangkhiate hong pichin Chiang un khotang, *politics*, leh saptuam ah makai in hong pang le uh dan zahtakna, diktatna, thutakna, kiniamkhiakna, midangte hehpihna, chihte a sisan ua belhsa ahihman in makai thupi suakthei ding uhi.

Hiai bangziak a gen kul ahihiam i chihleh Pathian in inkuan ana geldan, a thupidan leh apoimohdan genchian nuam i hi. Tua Pathian in a thiltup a tangtunna ding a inkuan ana bawl sung ah kizopna thagui tuambik thilsiam dang toh kibanglou in ana koihi, Adam leh Evi inkuan masate apan en leng:

1. Kichimatna tuambik (*incredible relationship*): “Kagu ah kipan guh, ka sa kipan sa” (Gen. 2:23)

2. Taksa hinna a kizopna (*intimate relationship*):

“Pasal a kipan lakkhiak” (Gen. 2:23; 1 Pet. 3:7)

3. Midang toh kopkhawm theihlauh kizopna (*exclusive relation*): “Pasal in a nu leh a pa apaian ding a a zi ah a belh ding” (Gen. 2:24)

4. Kizopna thukpen (*most profound relationship*): “Huchi in sa khat ahong hita ding uh” (Gen. 2:24)

5. Pathian in a Lam-et: Pathian linsak chi a zong ahi (Mal. 2:15). *Nang ah nam tampi ka bawl ding a...Kumpipate ahong piangkhe ding* (Gen. 17:4-6)

6. Kivaipuakna kichian om: Pathian thiltup tangtunna ding lampi khenkhat:

- Insung Mohpawtu Pa ahi-Siam masak a om, thuneitu (Gen. 2:21; 1 Tim. 2:13)
- Zi pasal panpihtu ding (Gen. 2:18; 3:16; 1 Kor. 11:3)
- Tate Sinsak ding – Phatuamngaitak a sinsak ding (Diut. 6:7; Pau. 22:6)
- Khauhdeuh a kep (*discipline*) ngam ding (Pau. 13:24; 19:18; 22:15; 23:13, 14; 29:15, 17)

- Insung kizopna (*governing principle*) – ki-itna (Eph. 5:25; Kol. 3:19); kingaihdamna (Eph. 4:32; Kol. 3:13) leh adang tampi om hi.

- Insung a Pate' tung ah thunei omlai – Insung a Pa in a thuneihna zang diklou a Pathian' dan a kalh Chiang in Pathian kigolh thei; Eli in Pathian sang a a tate zahtak zaw, a siamputna bei loh (1 Sam. 2:29ff), David khelhna ziaak in a insung ah namsau (2 Sam. 12:10), a tapa Amnon leh a tanu Tamar kingai (2 Sam. 13:14), Ananias leh Sapphira in nekgukna (*corruption*) ziaak in sihloh uhi (Nas. 5:1ff).

Inkuan kichi Pathian geldan ah ana thupi petmah hi. Pathian geldantak a nu-le-pate'n inkuan enkol hilehang Khristian inkuan tungtawn a Pathian' Lalgam leitung a hongtung petmah ding ahi hi. Himahleh setan in huai thei in insung a nu leh pate nasatak in ahon peibuaite hi. Etsakna ding in: Mipil leh etton takpen dia i gintakte uh, President Donald Trump tua azi neihlel azi thumna ahi, Joe Biden tua azi anihna, Elon Musk in zi nihvei neita, numei dang 4 toh

ta 14 anei chih ahi. Himahleh, khovel in inkuan leng bawldik theiloute gamsung bawldik dia agintak pente uh ahi mai mah uhi. Pathian deihdan a insung siangthou leh diktat a kikep ding athupipen ahi a, sum-le-pai a vak zoh leh vak zohlouh a tehna ding poimohpen ahi zenzen kei hi.

Insung kikepna ginalou gah khotang a hong kilangkha tampi muhtheih ding om hi. Zu leh khamtheih zuaknate ah papite, nitha kiloh vaipai chia khamsa a intung tamzaw papite, zing beltak a hotel a tutute papite, khamtheih zuak/*supply* a kipei tamzaw nupite leh papite, sepna mun a omlou semlou a khaloh la tamzaw insung nu leh pate mah hi. Inn bahara mi omsak khotang mitsipsak thil aom Chiang a “ka inluahte thilhih ka theihpih kei” chite nu-le-pate. Mi gam ah hichi omleh dakkal tamlou sung a hon hawlkhe ding uh ahi.

Hiai i gente adiklou ngen kigenkha hileh achihhuai mahmah mai! Himahleh ana dik ahih in tuh i khotnag leh nam maban ding amial mahmah chihna ahi. Lamka khopi ah *traffic policete'n helmet khuk ding* kum bangzahhiam apan *drive*

anei ua, i thumang kei mahmah uhi. Khopi dang ah va zinkhia unla, *mission field* a i neihte va-en sin dih ua, azumhuai! Naupang pauthei pante'n thumal khenkhat asiam dandan un aloukhia ua i theisiam hi. Hileleng pichin nung nasan a naupangte thumal zangden insung kisinsakna taksapdan kilatna khat ahi. Paulam ding zonglou in Nehemiah bang

in “Ahi, kei leh ka pa inkawte ka khialta uhi,” chiin Toupa' deihdan in Pate inkuan kikepna a pan lathak ding in Toupa'n hon houpiph chiat hen.

“Na tate uh phatuamngaitak in na sinsak ding ua, na inn ua na tutlai un, lampi a na pailai un, na luplai un leh na thoh Chiang bang un na gen ding uhi” (Diut. 6:7)

Pate Ni' zatnuam! ■

NAUPANGTE' HOIH DING DEIHNA IN AW

(Naupangte' Nipini thugelh, Nu-le-pa ngim in)

- Rev. L. Khaikhansong, DS/LND

Thumasa: Heutute'n Naupangte' Ni thugelh gelh di'n hamphatna hon pia ua kipahhuai ka sa hi. Day tuamtuam i kineih chiat a, naupangte'n a DAY uh kipahpih leh kithalawppih diak un a kilang hi. Zatpih kei leng bel zanglou ding ua, i saipihleh a kithalawppen hong hizel uhi. Ei' pi-dandan zuite ahi uh chih taklang pah hi.

Ei Saptuam zatdan ah, tu June kha Naupangte' Ni atukna kha ahi. Ani thu ah buai kei ni, naupang itna leh awlmohna zia in pichingte'n theih dia hoihsak point bangzahhiam ka hon gelh hi.

Tulai khovel siatna huihpi hattak nuai ah, **i tate Khovel toh kituh i hihziak in**, bitna

leh khosuah khiakna ding in suangphum kip leh muanhuai omsun tuh Toupa Jesu Khrist ahi chih namkip thak poimoh mahmah hi.

Khovel khangtou in hon tonpih siatna tuamtuam lak ah nu-le-pa ading in insung kepna lam toh kisai ah, bang pentak dik a bangtan a gamgi khun ding

hihiam chih leng hamhaih huaipi suak mah hi.

Hihding leh ding louh tampi kigen mahleh zuihkim, dikkim chih leng omthei taktak lou hi. Huchibang kal ah chikmah a hon zuausan ngeilou ding gil a gah goutan hon petu i Pathian mah i belh keileh siatna huihpi nuai ah bitna leh khosuah khiakna taktak mulou ding hihang.

Inkuan toh kisai ah: Superpower USA tuh “Pa neilou Gam” (*Land of the Fatherless*) kichi a, gamsung pumpi ah Nu-Pa kikhen percent sang petmah hi.

Huaiziak in, Pathian thugentu tampite’n sawtpi dingkip ding in ginta zoulou uh kichi hi. Huaiziak in, inkuan toh kisai ah –

1. George W Bush Sr. Former President USA in, “Inkuan ngaih poimoh masakpen a neih ding ahi” chi hi.

2. USA President Barak Obama in, “America in inkuan hattak mah i poimohpen” chi leuleu hi.

3. Billy Graham: “Hihkhelh lianpi ka neih pen ka inkuanpihte amau kia a tamveipi ka nawtsiat ahi. Hihthak theih hileh ka

inkuanpihte toh hun tamzaw sem zat ka sawm ding hi.”

4. Mother Teresa: What can we do to promote world peace? Go home and love your family (*Khovel lemna/muanna ding in bang hihtheih i nei a? Inn ah chiah kik inla na inkuan te it in*)

I ngaihtuahna hon lawng hen:

1. Nu Veikholam: “Tate i makaihna ah khalam leh taksa lam akikhen hetlouh ding ahi, khat poimoh ngaihzaw a khat i nelhsiah leh khebai a koih ding i hi.”

2. John Mc Arthur: “Pathian in tate enkol ding in nu-le-pate mohpuakna ana pia a, skulpte hiam, tuailai makaite hiam, sunday school sinsaktute kiang ah a pekei, amaute panpihtu lel ahi uh, hiai mohpuakna hunbit a nasepna hiding in ana bawl a, awl hun omlou nasepna ahi.”

3. Charles Sobraj: “Ka pa’ hon thilpiak manphapen ka min ahi.”

Hiaiteng ban ah inkuan toh kisai, mite thugen k’on behlap lai aw:

1. “Pathian’ gel & tup sepkhiakna ding leh khantouhna dia unit poimohpen ahi.

2. Kenneth

Chaffin:

"Inkuan pen khovel mite' kithuahkhawmna thupipen leh detpen ahi a, inkuan alohsap chiang in khovel a kipawlkhawmna tengteng lohsamsa ahi."

3. John

Mc

Arthur:

"Khristian inkuan pen tunding leh kepbitlouh ahihchiang in khotang ah thil tengteng akichim bang ahi a, siatna pumpelth theih ahinawn kei."

Naupangte' Ni kipatna zia:

Rev. Charles H. Leonard in kum 1856 June Pathianni nihna, a saptuam uah Naupangte' Ni chi in a septuam a, kumteng a zat gige ding chih ahi.

Azatna zia:

1. Khristian naupangte'n a thugin/sahkhua ua a lunglutna uh lahkhiakna hun ahih ding.
2. Naupang kemtute'n naupangte Toupa' deihna bang a Khristian hoihtak hong suahna ding ua panla ding a kichiam-thakna hun ahih ding chih ahi.

Huaiziak in, ei local Saptuam chiat in leng program kulmut zawdeuh bawl in, naupangte' a ding program nuam leh phatuamtak i bawl ban ah

naupang kem, piching nu-le-pate' kikhopna program tuam bawl hial in nu-le-pate'n tate i latni-a thuchiam i bawlte zui i hina hiam chih kivelna leh Khristian hoihtak hong suahna ding ua kipiakthakna hun in zang zel leng phatuam diak ding hi.

Pichingte, Biakin a lah tazou ngellou, naupang zia va zuih lah nuamsa zoulou i hihziak a Biakin kailouh theih ni a zang a, i kai lehleng naupangte' hunzat etnop en dia kuan mah i bat sang in phatuam zawlou ding hia? Naupangte' program mahleng, mittai biltaina ding kia manoh ahihkhak ding ven mahmah hoih ding hi.

1. Naupang kepna ah tha-thak lakna hun hihen:

Gamchiam lutlou ding Mosi in awlmoh luat zia in Israelte kiang ah dante simthak in thuhilhna gen tuantuan hi. Agen tuantunte lak ah hunteng a naupangte sinsak ding chih i mu tam mahmah hi.

Naupangte, ginna apat apial louhna ding uh deihna ahi. Nu-le-pate'n tate ahoih ua khamtheih guihtheih ahihkei nak ualeh apianthak ding uh ngaihkhaw saklou i hihkhak ding lauhhuai hi. I kisinsaknate

leh zuihding kichite *moral laws* dan maimai a ngaihtuah a, sahkua khat maimai chi a ngaizamtak a ahong khankhiak ding uh thil lauhhuai ahi.

2. Hunzat khop poimoh ngaih ni: Tangvalnou khat khailup di'n thutan khum in a-om. Apa, dan siam, laibu minthang taktak bawlkhia ahihman in thukhentu sap in leng thei mahmah hi.

Thukhentu in *“na pa na thei hoih hia? na huntawp tung na hita, hiai hun nanung ah na pa na muhdan/na pa’ mel na lungsim a hong latdan hon gen mah dih ve”* chiin a ngen hi. “Ka pa ka thei hoih mahmah, ka pa mel hichibang in ka mu, ka pa kiang ah thil khat hon hilhchian ding in ka va pai a, laigelh lai hong daktou a, ana paikhe phot ouh, ka man kei” ahon chih laileh, khatvei mah, hon kithuahpih ding in ka va naih a, amitbelh tung apan hon en a, “ana paikhe phot ouh, hiai laibu ka gelh khit poimoh ahi” ahon chihlai a, ahon etdan ka lungsim mitkha ah ahong kilang” hon chita mai hi. Tapa pa’n a sihdek kuan a apa’ mel a muhdan hiai himai mah ahi.

“Nang theih in dansiam (lawyer) leh laibu gelh minthang ahi, kei theihna ah bel, lawm mang (lost friend) ahi” tangvalpa in ahon chita mai hi. Thukhentu sap in amah zakkhop in “a laibu gelhkhin mahleh a tapa chan eive” achi nulunul hi.

Ngainatak a i kiang hong vil tu-le-tate bangzahvei i vaikhia kha ngei a? Hon suang mahmah, lametna leh kithalopna liantak toh hong zuan i tu-le-tate bangzahvei i lungliap sakta a?

I omlouh nung chiah a lungsim mitkha un bang hon chi muhdang ua? Hang loiloi, hang phuphu, pau nuanua leh kitom in maw... Bible sim a thumna nei in maw... Biakna awlmoh vuahzu daikai nuai a taikhe khankhan teitei in maw... nitaklam chia mizia kikhek gige in maw. **Toupa’n kepding hon piakte kem manlou zen a nasep poimohzaw bang nna hiding ahia?**

3. Hunteng a sinsak ding a thuhilh i hi: Tut, lampai, lup, thoh Chiang a phatuamngaitak a sinsak ding chih tuh athu vuak a sinsak ding hilou in hinna leh gamtat tungtawn a sinsak ding chihna ahi. Genthoh lam sang in sepkhiak thoh, ngaihkhia

thoh sang in muhthoh sinsakna in nna semzaw hi.

Tate'n mi eng kei uhenla, mi' neih bang nei samle uh chih ziaak a ahoihlou tan a phattuumngaih khak ding kiveng mahmah ni. Etkol ding bang a enkol manlou zen a phatuamngai i kisak kal a amaute' siatna ding leh ahankhuk ding uh khuaktu i suahkhak ding lauhhuai hi.

4. Hotdamna awlmoh masapen in nei ni: Pa khat in gul a khoi hi. A ann ding in zusa ngoute (sazu) bazar ah va lei hi. Gul' nitak ann ding a khat a paihlut leh zusa lau kisa in amuk bang ling sisip hial hi. Zusa hong lemgel in gul pen leivui vukkhum in agul kimulou phot ahihchiang in gal muangtak in om hi. Gul

khoitu in amuh in hehpih mahmah in zusa lakhia hi. A gul kimulou a koih mawk in bitna leh suahtakna tunlou dia, bitna leh suahtakna tuh pawlam apan hong kipat ngai ahi. Honkhia ding in Jesu Khrist sam lut in.

Hotdam hong hihchiang un asung ua teng Khasiangthou in (Gal. 4:6) thilhoih deihna, kuhkalna leh chihtakna lam ah pi ding hi. Huaiziak in Jesu Khrist kingakna suangphum neisak photphot leng a dangteng hong dik mai ding hi.

Thukhitna: Naupang' Ni i zatna ah nu-leh pate, sinsaktute Toupa' mai ah tha-thak la in, naktak a panla ding in kilankhe leng uthuai i sa a, Naupangte'n leng nuam leh manphatak in zatsawm leng maw. ■

KIPAHTHU GENNA

EBC Lamka North Division deihsakna tungtawn a, kou CES G. Mawgliante School leh Saptuam ading a vanzat poimoh mahmah Computer Desktop piak a ka om man un kipaklua in hiai i KTZ deihtohhuai tungtawn in ka kipahna uh k'on taklang uhi.

Toupa'n thupina tang hen.

Kipak lua ung,

Sd/- Upa Letkhokam Guite

Chairman LSC, CES Mawnglian

BIBLE STUDY



- Pastor Thuamminlian Guite

TEXT : PHILIPPITE 2:19-30

Thupi: TIMOTHY AND EPAPHRODITUS APAN SINLAI

Thupatna: Philippite 2:19-30 sung ah mimal nih - Timothi leh Epafrodita-te' tanchin tungtawn in Philippi Saptuamte hanthawn in om uhi. Khalui in Khrist Lavui (2:5-11) pansan in Khrist' lungput, huai bel kingaihniaamna leh midangte awlmohna thu, ban ah hotdamna lau leh ling kawm a semkhe ding (2:12-18) a sapna thu i genta uhi. Tutung a i sinna ding ah Paul' nasepna a panpihtu nihte'n Khrist batna nei a hinkhua leh a hotdamna uh lau leh ling kawm a a sepkhiahdan uh sinkhawm le'ng i chi hi. Missions lungput nei a i sim kawmkawm un, mimal hinkhua sinna (characterisation) toh pangkhawm in tutung i tang teelte i sinkhawm ding uhi.

Timothi' Hinkhua Apan Sinlai (2:19-24):¹⁹Abang-abang hileh na omdan uh ka theih a lungmuang a ka om theihna ding in Timothi na kiang ua hon sawl pah Toupa Jesu ah ka lamem hi.
²⁰Hichi bang lungsimpu a, na hoihna ding uh awlmoh midang kuamah ka neikei hi. ²¹Jesu Khrist thilte zonglou in, avek un amau tuam chiat a zong uhi.
²²Himahleh ama'n tuh ta in a pa' nna a sep bang in Tanchin hoih gen zakna ah kei a hon seppih chih theihchetna amah ah na nei uhi. ²³Huaiziak in bangchi'n ka om dia chih k'on theihchet peuhpeuh Chiang in amah hon

sawlkhiak pah ka kilamen hi;
²⁴Himahleh keimah mah leng ka hong pah ding chih Toupa ah ka kilamen hi.

Philippite' omdan a theihna ding in Paul in Timothi a kiang uah sawl ding ahihdan gen hi (t. 19). Philippite kiang a Timothi sawl ding Paul in poimoh a sakna ziaak ahiehleh Philippi saptuamte'n sunglam leh polam ah buaina tuamtuam tuak uhi (cf. 1:27-30; 4:2-3). Paul in saptuamte a awlmohdan hiai ah muhtheih in om hi. Saptuamte awlmoh mahmah ahihman in hichia nutsiat ding utlou in

amau kemtu ding in Timothi sawl sawm hi. Paul in Timothi toh kisai a genna ah, “Na hoihna ding uh awlmoh midang kuamah ka neikei hi,” (t. 20) chi in gen hial hi. Midangte’n amau’ angsung kia khual a a omlai un (t. 21), Timothi in bel midangte awlmohna lungput nei hi. Hiai a awlmoh a chih in 2:5na a Khrist in midangte a awlmohna lungput genna toh kibang hi.

Tang 22 ah Paul leh Timothi in kizopna hoihtak nei ahihdan muhteih in om hi. Amasapen ding in, pa leh ta kal a kizopna toh genteh in om hi. Lai siangthou mundang ah Paul in Timothi toh kisai hiai bang in gen hi “ginna a ka ta taktak” chi hi (1 Timothi 1:2). Paul in Timothi mimaltak a thei ahihdan muhteih in om hi. Nihna ding in, Tanchin Hoih nasepna ah kizopna nei uhi. Paul in Tanchin Hoih genzakna a ka seppih chi hi. Paul in Tanchin Hoih gen a khual a zinna ah Timothi in kithuahpih hi (Nas.16:1; 20:3–6). Huai ahihman in Paul in Timothi theichian mahmah hi. Hiai a *theichian* kichi kammal ahihleh etchetna hoihtak neih nung a paisuak chihna ahi.

Hiai bang a kizopna hoihtak leh kitheihchetna hoihtak a om man in Paul in Timothi muanhuaaisa ahihman in Philippi saptuamte kiang a sawl ding lauhtawwna neilou hi.

Epafrodita’ Hinkhua Apan Sinlai (25–30): ²⁵*Himahleh ka sanggam leh seppih leh sepaihipih leh na taksapna ua gamtang leh sawltak Epafrodita na kiang ua hon sawl kiphamoh ka sa hi; ²⁶Na vek un a hon ngai mahmah hi, a damlouh thu na zak un, a lungkham mahmah hi. ²⁷Si dektak in a china ngei a; himahleh Pathian in a tung ah hehpihna a nei a; amah tung kia leng hilou in, kei tung ah leng ahi sam a, huchi a lungkhamna ka neih sawnsawn louhna ding in. ²⁸Huaiziak in amah k’on sawl teitei hi, amah na muh Chiang un na kipahpih un, huchi a kei leng ka dah luat louhna ding in. ²⁹Huaiziak in kipaktak in Toupah ah amah na kipahpih unla; amah na ngaisang un; ³⁰Khrist nasepna ah amah tuh a hong si dek a, kei ding a na hihkimlouhte uh hon hihsak a tupna lam ah a hinna a khuai dektak hi.*

Philippite 2:25-30 sung ah Epafrodita’ hinkhua toh kisai muhteih in om hi. Paul leh

Timothi in mimal leh Tanchin Hoih nasepna ah kizopna hoihtak nei uhi. Epafrodita ahiehleh Tanchin Hoih nasepna ah kipumpiaktak a nasemmi ahihdan muhtheih in om hi. Tang 25-30 sung ah Paul in Epafrodita toh kisai a genna ahi, naseptu ginom leh muanhuai, kipumpiak leh hinna leng phal hial khop a Tanchin Hoih a ding a nasem ahihdan gen hi.

Paul in Epafrodita' hihna hiai bang in gen hi: "Ka sanggam leh seppih leh sepaihpah," chi hi (t. 25). Khrist pumpi sung ah unau khat, Pathian' nna sepna ah seppih leh khalam galdouna ah sepaihpah ahi. Huai omzia bel, Tanchin Hoih nasepna ah Epafrodita in mun poimoh mahmah luah ahihdan muhtheih in om hi. Huai kia leng hilou in Philippi saptuamte' a ding in sawltak leh nasemtu ahihdan leng muhtheih in om hi. Tang 25na a *sawltak* kichi ahiehleh Philippi saptuamte sik-le-tang a sawl a om ahihdan genna ahi.

Tang 25na ah *gamtang* kichi thumal poimoh mahmah ahi. Hiai thumal ahiehleh *biakna* leh *nasem* chi in leng kilet thei hi. Philippite 3:3 ah hiai thumal mah kizang a "Pathian kha

a *bia*" chi in kilet hi. Ei pau Laisiangthou ah *nasem* chia kilehnate hiaite ahi: Eks. 3:12; Johs. 24:2, 16-24, 31; Matt 4:10; Lk. 4:8; Nas 7:7; 26:7; 27:23; Heb 12:28. Pathian *bia* chi a kilehnate hiaite ahi: Luke 2:37; Nas 7:42 (*bia/chibaibuk*); 24:24; Phil 3:3; Heb 9:9; 10:2. Hiai bung leh tanglou a dang leng tampi om lai hi. Hiai bung leh tangte *English* Laisiangthou ah entuah lechin, *nasem* chia i lehna munte ah *worship* chia letpawl om ding a, *bia* chia i lehna munte uah *service* chia letpawl om ding uhi. Huai ahihman in, *nasem* chia kilehna munte ah *bia* chi in khek lechin leng a gen ut kilamdang tuanlou ding hi. Etsakna ding in, i tang lakna masa, Eksodas 3:12 bang *English* ah en le'ng: ASV, ESV, KJV, NKJV-te'n *serve* zang ding ua; NASB, NLT, NIV, NRSV-te'n *worship* zang ding uhi.

A pau bul (Greek) ah *biakna* or *bia* chih kammal nih om hi. A khat pen ahiehleh ei pau ah *khupboh* ahiehkeileh *bia* chi in kilet ding hi. A dang pen ahiehleh tua i gen ahi a, huai ahiehleh *bia* chih leh *nasem* chi in kilet thei tuaktuak hi. Huai ahihman in, Pathian' *nasem* i chih Pathian *biakna* ahihdan

phawkthak tuak mahmah hi. Ei lak ah *biakna* leh *nasep* a tuam bang a ngaihna lian mahmah bang in muhtheih in om hi. *Biakna* i gen chiang in atangpi in Biakin sung a nasepte genna deuh in kikoih hi. Himahleh, Laisiangthou' sinsakna ah *nasep* leh *biakna* kichi thumal khat ah anih in kiletthei tuak hi.

Philippite' sik-le-tang a sawl a om, Epafrodita in Paul' a ding a bangkim a sepsak lai in ama' hinna mahmah leng lauthawnhuai khop hial a kipia in Pathian' nna sem a om ahihdan muhtheih in om hi. Epafrodita ngei leng Timothi bang in ama' a ding enlou in midang awlmohna hinkhua nei hi. Si ding hial khop a Tanchin Hoih a ding a kipia ahihman in Philippi satuamte'n kipahpih a, ngaisang ding in Paul in ngetsak hial hi. Tang 30na a "*a hinna khuai dektak*" kichi Laisiangthou a thumal kizang mengmeng lou ahi. A thu omdantak ahiehleh laithaikap a kimawlni in bangkim taan ngam a laithai a kap genna toh kibang hi. Huai omzia bel, a hinna leng itlou khop a kipiakna genna ahi. Pathian' nna sepna ah a hinna kuaileh leng poisa

lou a kipiakna, a nasepna leh a *biakna* genna ahi.

Thukhitna leh Sinlai:

Philippite 2:19–30 sung ah Khrist' lungput bang pu mi nih – Timothi leh Epafrodita-te' hinkhua muhtheih in om hi. Amaute'n Khrist a om midangte awlmohna toh Pathian' nna sem in saptuamte a ding a kipia in sih leng poisa lou hial khop in Pathian' nna sem uhi. Pathian' Missions sepsuahna ding a poimoh mahmah 'hihna' amaute ah muhtheih in om hi. Hiai mi nihte'n Pathian' nna sepna ah a seppihte uh toh lungsim munkhat pu in sem uhi. Paul toh kizopna hoihtak a neihna ua pan sinlai laak ding hoih mahmah ahiehleh Pathian' nasemte lak ah kituahna, kitanauna, kimuanna leh muanhuaina poimoh ahihdan muhtheih in om hi. Huai mah Pathian' Missions sepsuahna ding a poimoh ahi. Pathian' nna sepna ah kilemlou leh kituakloutak a sepna in Pathian' kumpigam keklet ding nasapi in sukha thei hi.

Nihna ah, Pathian' nna sepna pen Pathian *biakna* ahi. English thupil in *work is worship* a chi hial uhi. Pathian

biakna pen Biakin sung a zat ding ahih lailai in khotang leh midangte toh kisukkhakna a i omdan (*nasep*) ah leng a kilat ding ahi. Timothy leh Epafrodita-te' hinkhua ah missions nasepna pen thugen

kia ahihlouhdan muhtheih in om hi. A niteng hunzatdan ua pan a muanhuaina uh leh a chihtakdan uh kilangkha hi. Pathian' a ding a nasepna Pathian biakna ahi chih phawkthak tuak mahmah hi. ■



Gammial Aw

Toupa gamna sepna gahsuah leh lohchin theihna ding a poimoh mahmah thilpiak leh thumna a tatsatlou a pang gige Saptuamte i Toupa leh hondampa Jesu Khrist min in chibai aw! Pathian hoihna ziaak in tuni dong A gamna sem a kalsuannate thawnlou ahihdan agah muhtheih ding semtute apan report khateng a i muh zelte ziaak in Pathian min i phat hi. Eisung kia hilou a gamdang tanpha a tanchinhoih tangkoupui a tuailai tamtakte sawlkhe theita i hihman in thupi i sa mahmah hi. Amaute'n leng amau hihtheihna zahzah suah a theih ngeilouh gam a mite kiang a tanchinhoih ei bang leltak in va puakkha thei i chih chiang in Pathian in i saptuam honpi dan lamdang leh thupi i sa mahmah a, thupina tengteng Amah i khusak thakthak ahi. Tua hihman in, sawlkhiak a om Missionary-te'n khamangthang tampite Jesu Khrist khebul a hon pilut theihna ding un thumna tampi toh delhzui zel ding in i kingen hi. Pathian in field tungtawn a i kalsuannate apan gah hon piak hiai anuai ate enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n field a i kalsuannate a hunhun a gah muhtheih hon pezel a, gingthak leh baptisna tangthak 16 hon piaknawnte ziaak a kipaithu gen ni. Amaute Khrist a ding a nungzui muanhuai hong hihtheihna ding un thumpih ni.

2. Jorethang, Sikkim ah biakin dia luahtheih ding inn hoihtak muh ahihnung in May kha apan zat pat hita a, May 04,2025 in Rev Dr Thangminlun Mangte, Field Superintendent in a latna leh honna nei hi.
3. NEBC Chyangthapu biakin menchim in a sukkhiak ziak a chimisia, munthak ah bawl a om zoh ahih toh kiton in May 07, 2025 in Rev Dr Thangminlun Mangte, Field Superintendent in Pathian kiang ah latna leh honna nei, kipahtu gen ni. Toupa'n huihsia leh vuahsiate lak a hon kepbitsakna ding in thum ni.
4. Kamla Bagan station, West Bengal a i gingtu Mr Arjun Chhetri kum bangzakhiam paisa a ana tuahsiat ziak in luguh kimkhat thuah nawnlouh a om, a chang a damlou in kaih in phathei zel hi. Tua hun chiang in, a inveng ua ginglou mite'n gingtu a suah ziak a hiai bang haksatna/damlouhna tuak ahi chi in thuvek thei zel uhi. Toupa'n ginglou mite lungsim a thu hon gensak a, Pathian in i gingtu Mr Arjun Chhetri a hihdamna ding in thum ni.
5. Field Dorka Khawmpi 8veina April 28-30, 2025 sung Birtamode a neih a om, lamzang leh lohchingtak a zoh in om hi. Hiai khawmpi hun a kumthum sung a Field Dorka makaihtu ding heutu telkhiak a omte'n Pathian ompihna toh a mohpuakna uh hon sepzoh theihna ding un thumpih ni.
6. NEBC Khawmpi June 9 - 11, 2025 sung Birtamode ah om ding hi. Hiai khawmpi pen amau a ding a hun poimoh mahmah ahihman in, bangmah buaina om lou a manphatak a zat ahih theihna ding leh amaute makaihtu ding heutu makai kitelna ding ah Toupa'n Ama deihbang heutu, Saptuamte itna toh makaih thei ding hon piakna ding in thum ni.
7. Central Nepal a i louma leng paihoih zel a, semtute'n sepding dan lam tuamtuam zong in kalsuan theizel uhi. Khasiangthou makaihna toh khamangthang tampi semtute kalsuanna tungtawn a muh ahih theihna ding in thum ni.
8. Tuuktui luan hun hong hita ahihman in Sikkim leh Nepal singtang lam a semtute kalsuanna leh a kep uh gingtute a ding in thum ni. Tuuktui luan hun chiang in vuah tamziak a buai

theihna tuamtuan, tui lian, menchim leh a dangdang omthei zelte lak a semtute Toupa kepbitna ngetsak ni.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Toupa'n misiangthoute thumna hon dawng in, April 16-17, 2025 sung Namgharia Study Centre naupangte leh khosung naupangte kigawm a 'Evangelistic Week & Sports' neih a om lohchingtak a zoh in omthei, kipahtu gen ni. Hiai hun a kihel naupangte lungsim a Pathian in thu a genzomna ding in thum ni.
2. Pityang khosung ah Pathian ompihna toh semtute'n inkuan bangzahhiamte kiang a tanchinhoih genpihthei ahihman un kipahtu gen ni. Amaute lungsim a Pathian in thu a genzom a, Pathian diktak hon theihna ding un thum ni.
3. Field a Garhpara mun a semtute omna ding Quarters zohkhiak a omtak toh kiton in April 28, 2025 in Field Superintendent in Pathian min a honna leh latna nei hi. Tu in, Garhpara mun pansan a semtu Pastor S Thangbiakmang leh inkuante'n luah uhi.
4. Noshima Pegu (Dimoroguri) hun bangtanhiam damlou a om Pathian in Saptuamte thumnate hon dawng in, tu in damna hoihtak ngahta hi. Kipahtu gen in, chidamna hoihtak hon neih a gingu muanhuai hong hihtheih zelna ding in thumpih lai ni.
5. Semtute'n Dhunaguri, Dimoroguri, leh Bitarbacha a tuailai nungak a om sunsunte samkhawm in 'One Day Special Class' chih minvuah in sinsakna hoihtak neihpih thei uh, kipahtu gen ni.
6. Field a semtute tate leh gingu tuailaite SEBA Matric leh Higher Secondary Examna ah lohchinna ngah omte ziaik in kipahtu gen ni. Amaute'n a lohchinna tungtawn ua Pathian hoihna tamsem a muh ua, Khrist a ding a theihpihtu muanhuai ahih theihna ding un thumpih ni.
7. Namgharia a i gingu Mr Ranuj Pegu h/o Chandrama Pegu hun bangtanhiam paisa apan damlouna a tuah ziaik in damdawi inn leh ICU tanpha a kep ahihning in, damzou lou in May 10, 2025 in a tangtawn mun ding in hon zotsan hi. Ama'n a zi, tanu

khat leh tapa khat nusia hi. Toupa'n lusuun inkuante a van khamuanna toh khamuan a a ompihna ding in thumpih ni.

8. Mrs Sikamoni Payeng (Kapurdhuwa) i gingtu biakna vai limsak lou in om a, semtute'n a ziak ding a zon Chiang un thohlawm leh Sawm-a-khat piak ding neih louh ziak a zumhuaisa a biakin kai ding thadah ahildan mukhia uhi. Semtute'n hoihtak in thilpiak toh kisai theisiamsak ua, amah leng kipaktak a biakin a kainawn theihna ding in thumpih ni.
9. Pityang leh Shitalmari a Pathian thu semtute tungtawn a houlimpih lel a om; Chitro Pegu, Krishno Pegu, leh Ronjit Pegu in Jesu Khrist Lal leh Hondampa ding ua hon saan theihna ding un thumpih ni.
10. Semtu Evan Haukhosiam Guite taksa hatlounhna khenkhat a neihziak in damdawi hih a kikem lel ahihman in thumpih ni. Pathian in damna hoihtak a piak a, chidamtak a hon sepzom theihna ding in thumpih lai ni.

C. HOJAI MISSIONS FIELD

KIPATHU GENNA LEH THUMNA DINGTE:

1. Hoihai leh Lanka Station ah May kha apan naupangte lak ah tuition tungtawn a nasepna pat in om nawnta, kipathu gen ni. Tuition Centre tungtawn a kalsuanna lamzangtak a hongpai zom a, manphatak a zat ahiththeihna ding leh ginglou naupang tamsem a kihelna ding un thum ni.
2. Hoihai leh Lanka ah tuni tan daltu omlou in tanchinhoih zalentak a genna semtute'n sunzom thei uh. Kipathu gen in, semtute sukkhak a om mite'n Jesu Krist a hondampa ding ua hon saan theihna ding un thum ni.
3. Purnima Devi kichi a veng mite'n gingtu ahih ding a phallouh uh ahi a, a inn kiim leh kiangte apan dalna omlou a gingtu a suah theihna ding in chihtaktak in thumpih ni.

D. GOALPARA MISSIONS FIELD

KIPATHU GENNA LEH THUMNA DINGTE:

1. Dhupdhara station ah Grassroot Football Coaching session nihna pat in omta a, tulel in naupang 18 omlel uh, kipathu gen ni. Football coaching tungtawn a khosung hausa, mipi,

nu leh pate toh kinaih semna hon tun ahihman in kipahhuai i sa mahmah hi. Football coaching lamzang leh manphatak a sutzop zel ahih theihna ding in thum ni.

2. Football coaching tungtawn a kalsuanna a vuaksuak mailouh a, tunung a gah kipahhuaitak muh ahihna ding in thum ni. Toupa'n semtu toh kithuahthei ding leh a sepkhawmpih theih ding Native worker hon piakna ding in thum ni.

E. KAMRUP DISTRICT

KIPAHTHU GENNA leh THUMNA DINGTE:

1. Kamrup District a semtu i neih inkuan thum omte'n a sepna mun chiat uh pansan in Pathian ompihna toh semzom thei zel uh, kipahthu gen ni. A gam mi tangthupha genpih theih ding omta ahihman in, amaute'n hotdamna a tan theihna ding un thum ni.
2. Semtute'n Bahajani khua a om Mr Moniram Boro Pathian thu hoihtak in houlimpih theih uh, Jesu a lal leh hondampa ding a hon saan theihna ding in thumpih ni.
3. Loharghat leh Chhaygoan station pansan a semtute'n tangthupha a genpihiph khak a neihte un Toupa itna hon theihiam ua, Jesu Khrist a lal leh hondampa ding a hon pom theihna ding un thumpih ni.
5. Bamunigaon station ah Toupa'n gingtu honpiak pahna ding in thum ni. Tanchinhoih gen khaknasa mite lungtang a Pathian in thu hong gensakna ding in thum ni.

F. BORBOHA AREA, NAGOAN DISTRICT

KIPAHTHU GENNA leh THUMNA DINGTE:


1. Borboha Area a semtu Evan NK Naulak leh inkuante'n chidam in sem sunzom thei zel uh, kipahthu gen ni. Borboha i louma a thak ahihman in hiai mun pansan a Karbi namte lak ah tangthupha chii tuh ahihtheihna ding in thum ni.
2. Community Health Care Project tungtawn a kalsuan ding semtute'n *plan* a nei ahihman un lamzangtak a kal hon suan ua, vanzat ding poimohte a hunhun a hon suktuah theihna ding un thum ni. Hiai *Project* tungtawn a evangelism nasepna lohching a hihna ding in thum ni. ■



EBC Insung Thu

HOME SCHOOL REPORT:

Convention English School (CES) nuai a “Home School” kichi ahiehleh home tuition bangbang a school building zang a, lai kihilhna genna ahi. School kai hun ngei mah zui in akai ding ua, himahleh naupang tamlou ahihman in classroom tuamtuum a khen sese kul lou ding, ban ah, period khat 40mins sese kul lou in, vanzat tam theithe (audio-visual, study aid) zang in kisinsak ding uhi.



Tukum in CES D. Leikot ah Home School pat ahi. Tulel in naupang 16 om uh a, semtu mi 2 in thazohtak in enkai uhi. Vanzat tuamtuum piak ahihban uah Smart TV leng 2 piak ahi uhi. A sinlai ding uh syllabus leng atuam kibawlsak hi. A patna leh etkhiakna ahihman in classroom leng nasatak in renovation kibawl a, carpet phahsuaksak in naupang teng kim ding cubical box shape in table kibawlsak hi.

Saptuum school a naupang tam omlouhna munteng ah hichibang paidan etton a nei in sutzop zel kisawm hi. Tuhun a naupangte thil zil nopdan leh theihbaih dan zui a zangkhaizaw kisinsakna bul patsawm i hi chih phawk in saptuamte’n thumna in delhzui zel ni.

CITY TOUR DELHI REPORT

Heutute’ deihsakna tang in City Tour Delhi ading in Sir M. Kamkhansut, Headmaster CES Mata Mualtam, Sir H. Ginmuan, Headmaster CES Buangmun leh Sir V. Ginkhenthang, Headmaster, CES Thuangtam-te toh April 21 – 29, 2025 sung Delhi khopi ka va sik thei uhi.

Lam Paidan Tangpi: April 21, 2025 in ka sepna mun chiat ua pan in Lengpui ah kisutuah in, a nizing April 22 in Lengpui airport apat Delhi dam leh bittak in ka tung uhi. EBCC Delhi leh EBCC Central Delhi Saptuamte toh nuamtak leh kipaktak a hun kikhelahtak a zangkhin in April 29, 2025 in ka hong kiknawn ua, tu’n damtak in ka sepna mun chiat uah ka omta uhi.

Hun Zatdan Tangpi: Delhi ka tun un IGI Airport ah Saptuamte’n “Zin Deihhuaite Konna Vaidawn Uh” chih banner leh pakkhi toh thupitak in honna vaidawn uhi.

Vaidawinna hun zatzoh in Delhi Metro hon hohpih pah ngal uhi. Delhi ka omsung un mun poimoh tuamtuam tampi niteng in TBUC EBCC Central Delhi in hon phakpih ua, nuam in manpha mahmah hi.

EBCC Central Delhi in ana pat uh Project “PMWT”, “Itna Meisel” leh City Church tuamtuamte’n a bawl uh Project-te Zodawn adia phatuam leh gahsua petmah ahihdan, a tangkhate akipah ban uah thaguan in hanthawn mahmah ahihdante ka va gen un amaute kipak in a sepgimnate uh thawnlou ahihdante atheih un kipak in manphasa mahmah uhi.

Kou a kuant mahmah in leng manpha ka sa ua, thilpiak honpiakte uh leh ka tung ua asiamna uh phathuai mahmah mai hi. Tua kia hilou in teacher sepna a naupangte sinsakna lam a dia phatuam ding tampi va mu in va kithei hi. Pathian in aleh tampi in vualzawl hen!

Hiai bang hamphatna ka tan uh ka kipak mahmah ua, Heutute, EBCC Central Delhi leh Pathian’ tung ah kipahthu ka gen uhi.

City Tour Team sik in,

- V. PHUNGKHANTHANG, *Headmaster*, CEHS, Sinzawl

Basic Bible School 2025 Report:

NEBC in kumteng a ana kizang, tukum in leng Basic Bible School a 10veina ding in NEBC Bhudabare Biakin ah nisim 31st March to 12th April 2025 sung buaina omlou a neih ahihman in Pathian tungah kipahthu ka gen hi.

Hiai hunsung in sinsaktu mi 13 apan subject tuamtuam 14 sintu ding a minkhum mi 53te kikulh in, zingkal dak 7:00am apan nitaklam dak 6:00pm tan sinsakna kipethei ahihman in, Toupa vualzawlina thupitak kitang ahi chih thei in ka lungkim mahmah uhi. Hiai hun sung mah, zingkal teng in kipumpiakna hun devotion kizang zel a, huai ah pitu 3te’n hon makaih zel uhi.

Pathian hoihna kiningchingtak mai, a tate apan hong luanglut in, nek-le-tak leh sum-le-pai a huhna bang leng hunkhop kimu ahihman in, Saptuamte masawinna khat hi angai in kilungkim mahmah mai hi. Huaiteng khenlam ah, program zoh ahih in, sintute lak ah Toupa’n gah hon musak pah in, Bhuttabari apan nungaknou khat GBC a B.Th. course zil ding a hong kuankhe diing in kisa ngal hi. Midang bangzahhiam leng kumnawn khawng a GBC ah Laisiangthou sin ding a hong kuankhiak uh lamet ahi. Toupa gam nasem ding a kizat ding lunglut a thupukna a laktheih man un Toupa’ min ka phat hi. Halleluia!

Hiai Basic Bible School apan sinsakna kipiante’n, tukia hilou a denchiang a Saptuam makai ding tuailaite lak ah Laisiangthou thutak leh sinsakna dik kisinsakna hoihtak ahihman in neihkhaklouh ding thil lauhuai hizaw hi chih hon theisak thakthak hi.

Toupa’n hiai program ding a honna thumpih a hon kithuahpih tengteng a vualzawlina bukim sem toh hon vualzawl zel hen aw.

- Rev Dr Thangminlun Mangte, Field Superintendent, HMF ■



DORCAS *Corner*

I. TOUPA MUANNA: June khathak ah hon piluttu i Pa Pathian min phat in om hen! Leitung i khualzinna ah lungnopna, kipahna, thawmhauna, lungkhamna, kingaihshiatna leh lametna bei bang a om in anuam leh ahaksa kihelhtuah ngitngat hi. Tuabang hun in anuai a Laisiangthou changte in kikhantuan le i chi hi.

1. Sam 34:18 ah *“Toupa’n lungtang khasiate anaih zel a, lungsim a kisik peuhmahte a hondam zel hi.”* Nute’n haksatna i tuah hun a Pathian i kiang nai a om gige ahihdan leh hon khamuan ut a hon panpih ut gige ahihdan i mu hi.
2. Mat. 11:28 – 30 ah *“Nou semgim leh puakgik paw tengteng aw, ka kiang ah hong pai un, keiman khawlina ka hon pe ding hi....”* Jesu kiang zuan a, i puakgikte ei kia a paw lou ding in hon chial hi.
3. Phil. 4:6 ah *“Bangmahlou ah mangbang kei un; himahleh thil bangkim ah, thumna leh ngetna, kipahthu genna toh na ngetnate uh Pathian kiang ah theihsak in om hen.”* Nute’n i lungkhamnate leh mangbatnate uh Pathian’ khamuanna muang kawm a thumna a tut ding Amah deiham ahi.

II. DOTPROJ: Pathian in i mat uh hon pi zel a DOTPROJ nuai a puankhuina toh kisai in sinsaktu mi 2 (nih) leh sintu mi 15-te’n puankhuina sinzomthei zel uhi. Puankhui zilsak kia hilou in niteng in Devotion neithe i ua, khalam mahmah ah leng phattuampih uhi. Counselling poimohte leng kineihpih thei zel hi.

III. DORCED: Tutung Class X & XII result puankhiak a om ah Ebenezer Academy a DORCED nuai a naupang 16-te’ hong lohching a, Toupa’ min i phat hi! Class X apat 3 (thum) Compartment mu om a, hong lohchin uh i deihsak hi.

Sln	Min	Class	Sln	Min	Class
1	Manngaihlian	X	9	Thangtansang	X
2	Teresa Niangngaihnuam	X	10	Khammuansang Ngaihte	XII Arts
3	Kaikhankhual	X	11	Mangmuanding	XII Arts
4	Kamminthang Lhoujem	X	12	Pumsuan Thang	XII Arts
5	M. Haumuansang	X	13	Laivenghim	XII Arts
6	Samuel T. Thanglalrem	X	14	Mercy Niangthianpiak	XII Science
7	Sialsawnkhual	X	15	Niangngaihsang	XII Science
8	Suanlal	X	16	Dongjoylian	XII Science



YOUTH *Corner*

TUAILAI '87 ETKIKNA

~ Upa HL Khankhup



"...Aw nang Tuailai '87, numei in anau nawi nelai a mangngilh ahi thei, himahleh, ke'n zaw... ka hon mangngilh kei hial ding hi..."

THUMAPI: Kum 1987 in ECC munchih mualchih a om Khristian Tuailai Pawl (KTP) te'n, "TUAILAI '87" chih min phuak in, thupi ding in, "Tuailai Khrist A Ding In" chih kizang hi. Hiai hunlai a Youth Promotor Rev. T. Pumzathang ahi.

Amah nasep siamdan maimai lou tuh, amah office Dorcas Hall ah Program Committee-te nasa deuhmai a thathousak in, mohpuakna tuamtuam latu ding department bawl in, tua department tuamtuamte Khasiangthou' makaihna leh Promotor makaihna in thanuamtak chiat in gamtang seseuh geuh uhi.

HALL LIANPI KIBAWL: Tuailai '87 Khawmpi Lian zatna ding in Lamka College, New Lamka mun ah Hall Lianpi mahmah khat tunding khiak in om a, Sing (wood) sa'ng mah in Gua-pum a khuam leh a zawl ding in kihahzat mahmah hi. Aziak ahihleh, singtawn sang a gua-tawn asauzawk zia in Hall Lianpi lamna ding in zattheih zaw hi. Hall ah mi tazou lou in asung-apua mi dim gige hi.

PROGRAM ZATDAN TANGPITE:

1. Thugenna hun
2. Seminar Thupi tuamtuam sinna hun
3. Lasak kidemna hun
4. Special no. sakna hun
5. Khutsiam silbawl kidemna
6. "A paina ding lampi ah naupang chiil in" Sermon gelh kidemna
7. "Ka hinkhua a ka thiltupte" chih gelh kidemna
8. Adangdang

Hiai program hunsung a mipite thathousak leh mit taisak mahmah aom a huaite tuh, “Jingsol Band” kichi KTP Kangkapte ahi uh. Amaute’n a lasakte uh alim toh lak in, music bukim toh thua in lam uhi. A lasakte lak ua mi lungsim khoih mahmah khat ahiehleh, “Tulai Khangthakte’n, Zu leh sa ne in, Pathian omkei chi’n sahkua neilou” chih la ahi.

Hiai Tuailai ’87 Khawmpi a kipan in la lam a khanlohna nasatak leng hong tung in, Tuailai Missionary ding a kipekhia bang om hi. Tuchiang a BYF Khawmpi lian i neihte hong kipatna masa Tuailai ’87 Khawmpi Lian i neih uapan ahi, i chithei ding hi.

MIPI’ PHATNA LASAK NUAM THEI MAHMAH:

Lapitute’n dohsang tung apan in la honpi ua, huai hun a Lapulian Rev. V. Pumkam, Choir Conductor (Music Promoter) ahi. Hiai hun a mipi lasakkhop a kisa mun mahmah tuh - *i) Zogam Lei nibang hong taang hen, chih leh ii) Tuailaite hun leh Ni kipahhuai* chih late ahi hi.

THUKHUPNA: Toupa’n BYFte hon khangkangsak toutou a, tuni Chiang in Aw hoihzaw, vanzat hoihzaw, lasiam tamzaw, ami mahmah leng hoihzaw, kizep kicheina lah thupizaw, in i omta hi. Huchi ahieh kawmkawm in Khalam tuipaaina leh Khalam a lapawl hing, Biakna a phatna lasak hing i neihsem ding uh poimoh lua hita ahi, chih BYFte’n i phawk semsem uh deihhuai i sa hi. ■



CHILDREN'S *Corner*

KHRIST NUNGZUI NAUPANG

(Naupangte' Nipini Thupuak)

Deihthoh huai Naupangte aw! Naupangte' Nipini Chibai.

Leitung i damsung hun in, i Toupa Jesu Khrist in a nungzui ding, A thu sinsakte mang ding leh Amah etton a nei ding in hon deih hi. Tuni Naupangte' Nipini ahihto kiton in, Jesu' nung i zuihna a tulai khovel ah Khristian naupangte adia poimoh mahmah thil 2 (Nih) ka hon gen ding hi.

1. JESU A MASA A KOIH DING: [Mark 8:34] *Jesu in “Kuapeuh in hon zuih a-utleh amah kimangngilh in, a Kros pua in hon zui hen”, achi hi. Mihingte, aneu-alian kuapeuh in duh-le-deih, ut-le-utlough, poimohsak-leh-poimohsak louh chihthe i nei vek uhi. Khovel mite’n amau deihtelna zang in amau ut-leh-deihthe leh poimohsakte mah hih uhi. Himahleh, gingtute huai bang a ei a masa a kikoih a, ei chih dandan leh ut dandan a kalsuan dingte i hikei uhi. Jesu a masa a koih a, i lunggulh mahmahte natawm Jesu deih bang a hihkeileh hihlou dingte i hi uhi. Huchimah bang in, haksa i sak leh i lit mahmahte leng Toupa deih ahiehleh i kalsuan teitei ding uh ahi. Huai tuh Jesu a masa a koihna ahi.*

- Na mihinna in a ut leh lunggulhte sang in Jesu a masa in koih in.
- Na lawm-le-vualte sang in Jesu a masa in koih in.
- Na thil neihte (vante) sang in Jesu a masa in koih in.

Aziak tuh i Toupa Jesu mah in “Kuapeuh tulai khang angkawm leh gilou chingte lak a keimah leh ka thu zumpih, Mihing Tapa in, Angel siangthoute toh a Pa thupina a kivan a ahong hun Chiang in, huai mite ahon zumpih thuk sam ding” a chi hi. [Mark 8:38]

2. KHAT LEH KHAT KI IT-TUAH DING: [Johan 13:34-35] *Toupa Jesu Khrist in “Thupiak thak kon pia ahi, ki-ittuah un; ken nou k’on it bang in, nou leng ki-ittuah un. Na ki-ittuah uleh mi tengteng in ka nungzuite na hi uh chih hiai ah athei ding uh” a chi hi. Ei hon it leh hon duat mahmah i nu-le-pate, i sanggamte leh hon deihsak i tanaute leh lawmte khawng it ding a haksa kei a, it leng i it uhi. Huchimah bang in, i pau kibatpih, i nam kibatpihte it ding leng ahaksa kei a, i it thei mahmah uhi. Himahleh huaibang itna tuh Khristian hilou, Jesu Khrist theikha loute’n leng aneih uh ahi. I Toupa in it ding achi zaw huai tankia ahikei a, i gingu hihpihte, pau kibanglou, lungput leh mel-le-puam i kibat pihlouhte ban ah i melmate na ngawn it ding in hon deih hi. Huai tuh Jesu nungzuite i hi chih a kilatna ding leh gingloumite toh i kibatlouhna ahi.*

Huaiziak in, naupangte aw! I gam buai laitak a, i kiim i kiang ah huat ding, iiplah ding tampi omlaitak in, na insung uah, na school kaina uah, koimun peuh ah- Jesu a masa a koih in na omdan, kampau leh gamtat ah itna tungtawn in Jesu Khrist nungzui na hi chih na hihlang gige in aw!

Toupa’n hon vualzawl hen! Naupangte’ Nipini zatnuam.

- REV. M GINMINTHANG
Child Co-ordinator, EBC





Ordain Sunna

1. Min: **UPA T. PAUKHANPIANG**
 2. Pianni: March 11, 1963
 3. Pianna Khua: Tonglon – T
 4. Baptisma Tanni: July 08, 1985
 5. Pa Min: (L) T. Zamsuan
 6. Nu Min: (L) Chingkhosam
 7. Zi Min: Paudeihching
 8. Kitenni: 1985
Kitengsaktu: Pastor Thualkhothang
 9. Gil A Gah Goutan Neihzah: 05 (Numei: 03 leh Pasal: 02)
 10. Upa Ordain Kum: 2022
Ordination Petu: Rev. S. Vung Minthang
 11. Upa Pahtakna Lai San Kum: Active
 12. Tulel A Omna Saptuam: EBCC P. Jordan (Lamka East Division)
 13. Tulel A Kizatna: TBUC **Chairman**
 14. Toupa' Kiang A Tawldam Ni: April 04, 2025
Vui Ni: April 04, 2025
 15. Vuitu Pastor & Saptuam: Pastor G. Sanglian, EBCC Pearsonmun
 16. Natna: Liver Cancer
 17. A TANCHIN GELHBEH NOP: Pianken a khutsiam, sik seeksiam ahi. Lawm bawl siam leh mi polhnuamtak ahi. La phuah leh sak lunglut mi leng ahi a, a la phuahle lak ah, 'Genseng Kei Ni' Album 2010 a Chingngaihlian leh a Unu Thiankim in asak 'Nang' siik *khekhap ken hong siik zel ning*' leng telkha hi.
- Toupa'n a nutsiat a inkuante khamuan in ompih zel hen.



1. Min: **UPA T. KHAMZADOU**
2. Pianni: November 17, 1941
3. Pianna Khua: Sinzawl (Thanlon Sub-Division)
4. Baptisma Tanni: 1960 (Ani theilou)
5. Pa Min: (L) T. Vumpum
6. Nu Min: (L) Gouzaman
7. Zi Min: Nemzen
8. Kitenni: April 10, 1965
Kitengsaktu: Pastor Lamgin



9. Gil A Gah Goutan Neihzah: 09 (Numei: 06 leh Pasal: 03)
10. Upa Ordain Kum: January 20, 1979
Ordination Petu: Rev. Liankhosiam
11. Upa Pahtakna Lai San Kum: 2004
12. Tulel A Omna Saptuam: EBCC Hebron (Lamka West Division)
13. Tulel A Kizatna:
14. Toupa' Kiang A Tawldam Ni: April 21, 2025
Vui Ni: April 22, 2025
15. Vuitu Pastor & Saptuam: Pastor T. Songkhanthang, EBCC Hebron
16. Natna: Heart case
17. A TANCHIN GELHBEH NOP: Amah ahihlel mifel leh paunuam, gen-le-sak ding omte ahun leh amun zil a thupukna laksiam mi ahi. Sinzawl a aomsung in Local Chairman, Local Secretary, KTP Secretary, Dorcas Adviser, Building Committee Secretary ahihban ah, Tuivai District ah Founder Secretary in pang hi. Sinzawl ah Nupi leh Papi lehkha sim theiloute ading in Night School bawlsak a, tampi'n phattuampih uhi.

1979 kum in naupangte school kaina leh khosakna zangkhaizaw ding lam-etna in Lamka ah pem in, tulel in Hebron Veng ah khosa uhi. Hebron Saptuam ah Chairman, Vice Chairman leh Biakin munding *plot* tuamtuum zong in atheihtawp in pang hi. DWC/ Lamka Division ah Vice Chairman leh Member in pangkha hi. 2004 EBC Khawmpi lian ah pahtakna lai sang hi.

Toupa'n a nutsiat a inkuante khamuan in ompih zel hen.

1. Min: **UPA VIALSUANMAWI @VIALSUAN**
2. Pianni: May 16, 1964
3. Pianna Khua: Bungjang
4. Baptisma Tanni: Ani kitheilou
5. Pa Min: (L) Khupvung
6. Nu Min: (L) Neizen
7. Zi Min: Niangneihching
8. Kitenni: December 1983
Kitengsaktu: Pastor Ngulkam
9. Gil A Gah Goutan Neihzah: 06 (Numei: 04 leh Pasal: 02)
10. Upa Ordain Kum: December 11, 2016
Ordination Petu: Rev. S. Vung Minthang
11. Upa Pahtakna Lai San Kum: Active



12. Tulel A Omna Saptuam: EBCC Mualpi (Lamka South Division)
13. Tulel A Kizatna: TBUC Chairman
14. Toupa' Kiang A Tawldam Ni: May 06, 2025
Vui Ni: May 06, 2025
15. Vuitu Pastor & Saptuam: Pastor V. Pauthianmuan, EBCC Mualpi
16. Natna: Stroke
17. A TANCHIN GELHBEH NOP: TBUC ah, alut hunchet record hoihtak om louh ziaik in theihchet hikei mahleh 2011 – 2013 term sung Treasurer ana len a, a term nawn 2014 – 2016 sung Local Secretary len a, 2017 – 2019 sung Finance leh 2020 apan in asih dong Local Chairman hihna len hi.


Damlouhna leh Ahun Nanung: Upa Vialsuanmawi @ Vialsuan taksa damtheihna lam tasam mi ahi. Kum 2013 in Kal (Kidney) natna ziaik in RIMS, Imphal ah ki-enkol hi. 2014 in a siguite operation ding in RIMS, Imphal mah ah admit in om nawn a, 2021 kum in Spinal cord ziaik in Shija Hospital ah a Kawng operation nawn a, huaizoh in 2024 in Appendix operation ding in District Hospital, Lamka ah ki-enkol nawn hi.

May 5, 2025 dak 12 – 01:00pm kikal in huansung a nna sem a omlai puk in, inmun ah sawtlou buaipih ahihnung in District Hospital, Lamka a puaklut in om hi. Test tuamtuamte' result normal ahihziak in Medicine ward ah admit in om hi. A zing May 06, 2025 zingkal 05:40am in lamet louh laitak in a tangtawn munding hon zotsanta hi.

Toupa'n a nutsiat a inkuante khamuan in ompih zel hen.

1. Min: **REV. KHUALKHOJAM**
2. Pianni: March 19, 1937
3. Pianna Khua: Sugnu
4. Baptistna tangsaktu: Pastor Taitea
5. Pa Min: Dhana Singh
6. Nu Min: Khuman Leima Devi
7. Zi Min: Chiinzaching
8. Kitenni: 1964

Kitengsaktu: Pastor Taitea



9. Gil A Gah Goutan Neihzah: 06 (Numei: 03 leh Pasal: 03)
Tu-18 leh Tuson-8 mu man hi.
10. Upa Ordain Kum: January 15, 1981
Upa Pahtakna Lai Sangta hi
11. Tulel A Omna Saptuam: EBCC Kanaan (Lamka South Division)
12. Tulel A Kizatna: TBUC Member
13. Toupau' Kiang A Tawldam Ni: May 14, 2025
Vui Ni: May 15, 2025
14. Vuitu Pastor & Saptuam: Pastor L Siamlalmuan, EBCC Kanaan
15. Natna: Cancer
16. A TANCHIN GELHBEH NOP:

Amau unau 6 himahle uh a pianpih sanggamte'n a neulai in sihsanvek uhi. Tua nung sawtlou in apan a sihsan nawn a, anu toh amah kia hong khosatou uhi. Sawtlou nung in anu'n pasal aneihsan nawn a, amah kia gentheitak in hong khosatou hi. Kum 18 ahih in kilohna di zong in Suangpek khua a Pu Khualkhai Valte hon bel a, aman ana kem in amin Khualkhojam chi in ana phuahsak hi.

Tua kipan Belbing khua a alawm khat toh kiloh ding in kuan ua, huai khua ah Oja Thiankhohen in Pathian thu ana houlimpih in Khristian hong suak hi. Belbing apan in Singmun khua ah pem ua huai mun ah loubawl in khosa uhi. 1970, November 27 in buhvuih saanlaitak in a lounun a Pathian houpihna tang in pianthak taktakna ana nei hi.

1972 in Missionary ding in ECC in ana la a, huchi in Pathian' nna ana semtou in a kum nawn in Sugnu ah posting hi. Sugnu, Khuangkhai, Phaisan, Khuainuai, Muijawl, B. Kaljang, Tuinuphai, G.Monglian, New Khaukual khuate ana bial hi. Biakin ana phuikhiatnate: Tuinuphai-1978, Sugnu-1989, D. Phailian-1995 leh Singngat-1997.

2002 kum in ana pension a, himahleh Pathian nasep khawl tuanlou in 7th MR ah Pastor nna vasem a, Lamka lak ah thumpawl tuamtuan ana makaih hi. Pathian nna anasep sung in Dan in mi 25 ana kitengsak a, mi 150 Baptisma ana tangsak hi.

Toupa'n a nutsiat a inkuante ompih in khamuan zel hen. ■



JUNE 2025

Kipahthu Genna leh THUMNA DINGTE

01 NIPINI: Tukha sung in Tuailai 2025 Khawmpi Lian toh kisai in Motivational Tour leh Kisinsaknate pat hita ding hi. Pathian' deihdan a kalsuan ahihna ding in thum ni. Tukha a kipan EBC, Lamka South Division BCD toh NEST, Lamka kithuah in Division sung ah Intermediate leh Senior pawlte ngimbiik a nei in "Mental Health, Drugs, Sex, Phone abuse leh poimoh tuamtuanme" local chih ah sinsak ding uh, thumna in phawk ni. June 02 – 14 sung EBCC Lailam Veng BYF in Basic Sol-fa Training nei ding. Hiai hun ah Thangbiaklal Valte, Music Promotor EBC sinsaktu in pang ding thumna ah phawk ni.

02 SEPPATNI: June 03 – 08 sung EBCC Hebron in Papi Camp nei ding. Hiai hun ah Evan. Upa T. Damkhotang thugentu in pang ding. Camp lohching leh gahsua ahihna ding in thum ni.

03 SEPNAWNNI: Apaisa March 04 – 21 sung Evangelist Teacher-te adia Workshop kisai Pathian' ompihna toh lohchingtak a kizou kipahtu gen in, semtute'n asin bangbang uh manpha leh gahsua dia ahon zatkhiaaktheihna ding un thumna ah phawk ni. Zingchiang June 04, 2025 in CEC meeting ormding, manpha leh gahsuahtak a zoh ahihna ding in thumpih ni.

04 NILAINI: June 05 – 08 sung, EBCC College Veng in BCD Chialpina nei ding, Rev. Chinkhengoupau Buansing, Youth Co-ordinator EBC thugentu in pang ding. Hiai hun toh kituak in NTBC, Bible Hill in leng Chialpi nei ding, Evan Lianding Guite

thugentu in pang ding. Chialpi lohching leh gahsua ahihna ding in thumna ah phawk ni.

05 NINGANI: June 06 – 08 sung, EBCC Immanuel, Headquarters Veng in Naupang Chialpi nei ding, Rev. Gin Malsawm, Principal GBC thugentu in pang ding. Chialpi lohching leh gahsua ahihna ding in thumna ah phawk ni.

06 SINTAWPNI: Saptuam in Khrist nungzuihna leh A nungzui bawltu ding seek dia panlakna paitou thumna in phawk ni. Pastor-te ah pan in, Upate, Semtute leh Saptuam heutate tawn a sepkhiaak ding a lemgel ahi.

07 KIGINNI: June 08, Pentecost Day in Rev. K. Kamchinkhup, General Secretary EBC in EBCC Jordan, Lamka East Division ah; Rev. M. Zalian Guite, Director of Ministries EBC in EBCC Bungmual, Lamka West Division ah; Rev. V. Goubiakmuan, DS Sialkal Division in EBCC Gilgal leh Rev. N. Tuang Lang, DS Lamka East Division in EBCC Bethlehem ah Missions Motivation hun ah thugenna hun zang ding uhi.

08 NIPINI: Tuni Pentecost Day zatna tungtawn a Kha Siangthou ompihna leh tonpihna Ami siangthoute'n tang a hinkhua a Pathian' deihdan lam zuih ahihna di'n thum ni. June 09 – 14 sung Evangelical Baptist Convention (HQ), Baptist Children Department leh Child Evangelism Fellowship (CEF) kithuah in Teaching Children Effectively Level – I (TCE – I) neih in om ding hi. Hiai hun ah Child Co-ordinator, EBC tel in Naupang Sinsaktu 25-te kihel ding uhi.

09 SEPPATNI: June 09 – 12 sung NEBC Khawmpi om ding a, hiai hun ah Director of Missions leh a team-te'n va uap ding uh, thumna in phawk ni. Hiai Khawmpi Himalayan Missions Field amau leh amau kimakaihna ding a kalbi masa ahihman in Heutu ding telna leng om ding hi. Pathian' deihbang Heutu telkhiak ahihna ding in thum ni.

10 SEPNAWNNI: Saptuam in nasepna poimoh mahmah a aneih NDPN keklian a, hiai nasepna i lak aliansem a paipih asawmna thumna a phawk in, NDPN tungtawn a Pathian' Mission lamzangtak a sep a a-omna ding in thum ni. June 11-13 sung BDC Zenhang Lamka Numei Lehlang Camp ah Evan. Lianding Guite thugentu in pang ding, Camp lohching leh gahsuahtak a zoh ahihtheihna ding in thumpih ni.

11 NILAINI: Khopi Saptuam-te'n akim leh kiang ua omte Khristian hinkhua alahkhiak ua amaute Khalam saltanna apan a hotkhiak theihna ding un thum ni.

12 NINGANI: June 13 – 14 in EBC Singngat Division sung a centre nih (EBCC Singngat leh EBCC New Kangkap) ah Saptuam' sum saidan kisinsakna om ding. Sinsaktu dingte leh sintu dingte thumpih ni.

13 SINTAWPNI: June 14 – 15, sung EBCC Sinzawl in Pate' Nipini zang ding a, Rev. M. Zalian Guite, Director of Ministries EBC thugentu in pang ding. Hiai hun toh kituak mah in EBCC Guwahati in Pate' Ni zang ding a, Rev. Thawndoulain, Director of Missions EBC thugentu in pang ding. Hiai hunsung mah in Seminar leng makaih ding hi. June 14 in Central Dorcas Sub Committee' saina in Lamka East Division sung a khochih Dorka pawlte "Numei Gahsua" chih thupi zang in Seminar om ding hi. Hiai hun ah sinsaktu

in Nu Nemlawmching, Dorcas Co-ordinator EBC pang ding hi.

14 KIGINNI: June 15, Pate' Nipini in Rev. K. Kamchinkhup, General Secretary EBC in EBCC Bukpi, Thanlon Division ah; Rev. Nenglian Vualnam, Director of Development EBC in EBCC Jordan, Lamka East Division ah; Evan. Lianding Guite in EBCC College Veng, Lamka East Division ah; Rev. N. Tuang Lang, DS Lamka East Division in EBCC V. Munhoih ah; Rev. Gin Malsawm, Principal GBC in EBCC Bungmual ah; Rev. Khamkhanchin Ngaihte, DS Singngat Division in EBCC G. Bualjang leh Rev. V. Goubiakmuan, DS Sialkal Division in EBCC Vaikhawtlang ah hun zang chiat ding uhi.

15 NIPINI: Tuni munchih mualchih a Pate' Nipini zatna munte ah Pathian' ompihna toh lohchingtak a zat ahihna ding in thumna ah phawk ni.

16 SEPPATNI: June 17 - 22 sung ZBCA Youth Conference Tulsa USA ah om ding, Thugentu in Evan. Upa T. Damkhotang pang ding.

17 SEPNAWNNI: Saptuam in kepngai Naupangte kepna ding a kalsuanna omsate ban ah kalsuan thak aneih sawmte thumna in phawk ni. Tulel in Saptuam in Naupang kepna i neihte: Hostel a kepna, amau inn pansan a kepna leh Naupang nipi skul a kepna te thumna ah phawk in, amaute Khrist khebul tut ahihtheihna ding a lamaktute leng thumpih ni.

18 NILAINI: June 19 – 22 sung Naupangte' Nipini huam in EBCC D. Phailian in Naupang Chialpi nei ding a, Rev. Gin Malsawm, Principal GBC thugentu in pang ding. Hiai hunsung mah in EBCC Songtal inleng Chialpi nei ding a, Evan. Lianding Guite thugentu in pang ding hi. Chialpi lohching leh gahsua ahihna ding in thumna ah phawk ni.

19 NINGANI: June 20 – 22 sung Naupangte' Nipini huam in EBCC Tangnuam in Naupang Chialpi nei ding a, Evan. M. Thangminlian thugentu in pang ding. Hiai hunsung mah in EBCC Delhi in Chialpina nei ding a, Rev. Chinkhengoupau Buansing, Youth Co-ordinator EBC thugentu in pang ding hi. Chialpi lohching leh gahsua ahahna ding in thumna ah phawk ni.

20 SINTAWPNI: June 21, 'EBC Finance Management Guide - 2024' Kilamlahna Lamka West Division ah neih hi ding hi. Hiai hun a Sinsaktu ding leh atel ding mite thumna ah phawk ni. June 21-22 sung Naupangte' Nipini in Rev. Pumsuanmung Naulak, DS Lamka West Division in EBCC Bethany, Bungmual ah hun zang ding. Hiai hunsung mah in Rev. Ginminthang Mangte, Child Co-ordinator EBC in EBCC Pearsonmun ah hun zang ding.

21 KIGINNI: Rev. Nenglian Vualnam, Director of Development EBC in Naupangte' Nipini, EBCC College Veng, Lamka East Division ah hun zang ding.

22 NIPINI: Tuni munchih mualchih a Naupangte' Nipini zatna munte ah Pathian' ompihna toh lohchingtak a zat ahahna ding leh Naupangte Pathian' deihna lampi sinsak poimoh ahahdan phawkthak ahahna ding in thum ni.

23 SEPPATNI: Saptuam in khamtheih a saltangte' adia kalsuanna aneihsa ban ah, tukum in amaute panpih sawm a ginna leh kalsuanna ding alemgete thumna in phawk ni. June 23-29 sung AMC Nashville, USA ah Evan. Upa T. Damkhotang in Pathian' thutak genna nei ding hi.

24 SEPNAWNNI: June 25 – 29 sung EBCC Bangaluru BYF saina in Music & Worship Seminar nei ding uhi. Hiai hun ah Thangbiaklal Valte, Music Promotor EBC sinsaktu in pang ding hi.

25 NILAINI: Division thak a Divisional Superintendent-te ading in thum ni. Amaute'n Saptuam kepna zangkhai zaw leh kizenzaw ding a, hoihlam leh masawn lam ahon nawtna ding un thumpih ni. June 26 – 29 sung Thanlon Pastor Bial in Naupang Camp EBCC Thanlon ah nei ding, thugentu in Evan. Lianding Guite pang ding. Camp lohching leh gahsua ahahna ding in thum ni.

26 NINGANI: June 27 – 29 sung EBC, Sialkal Division Dorka Khawmpi 42na EBCC Vaikhawtlang ah nei ding. Hiai hun ah Rev. V. Goubiakmuan, DS Sialkal Division leh Pastor B. Paubiaksang-te thugen in pang ding uhi.

27 SINTAWPNI: CES Manual 2023 dungzui in, Saptuam in School 45 i neihte lak ah CES D. Leikot ah Home School pat in omtheita a, Naupang 16 leh semtu 2 om, amaute leh Saptuam School ading in thum ni. Evangelist Teacher leh Student-te Toupa' ompihna toh hong lamzang zelna ding un thumpih ni.

28 KIGINNI: LRRC (Lametna mun) a khamtheih zongsangte kepna pai hoihtou zel, semtute leh kep a om inmates-te Pathian' kepna ngetsak in thumpih ni. May 26 – 28 sung Evan. N. Thangsuanpau Thugen a pang in Chialpina lohchingtak a neihteih in om a, kipahthu gen ni. LRRC in masawn touzel a, Local Saptuam leh poimoh a Chialna omte ah hun zangthei zel ua, maban ah leng Pathian' deihna bang a kalsuanthei zel ding in thumpih ni.

29 NIPINI: Tuailai 2025 leh NEST Lamka toh kithuah a khangnou leh tuailaite lak a khamtheih leh saltan theihna tuamtum toh kisai SURVEY bawl a-om lamzang leh lohchingtak a nei ahahna ding in thum ni.

30 SEPPATNI: Tukum in CES nuai a Kaikho-en Academy, Suandoh leh CES Thanlon ah Pawl 9 Admission pattheih in om kipahthu gen in, semtute leh naupangte thumna in phawk ni. ■

BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,

Khristian Thukizakna

P.O. Box-6, Dorcas Hall,
New Lamka-795006, Manipur, India



JUNE 08, 2025
**PENTECOST
DAY**